

明史

二

蘇氏藏書

PDG

明史卷一

本紀第一

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

太祖一

太祖開天行道肇紀立極大聖至神仁文義武俊德成
功高皇帝諱元璋字國瑞姓朱氏先世家沛徙句容再
徙泗州父世珍始徙濠州之鍾離生四子太祖其季也
母陳氏方娠夢神授藥一丸置掌中有光吞之寤口餘
香氣及產紅光滿室自是夜數有光起鄰里望見驚以
爲火輒奔救至則無有比長姿貌雄傑奇骨貫頂志意

廓然人莫能測至正四年旱蝗大饑疫太祖時年十七
 父母兄相繼歿貧不克葬里人劉繼祖與之地乃克葬
 卽鳳陽陵也太祖孤無所依乃入皇覺寺爲僧逾月遊
 食合肥道病二紫衣人與俱護視甚至病已失所在凡
 歷光固汝潁諸州三年復還寺當是時元政不綱盜賊
 四起劉福通奉韓山童假宋後起潁徐壽輝僭帝號起
 蕪李二彭大趙均用起徐衆各數萬竝置將帥殺吏侵
 畧郡縣而方國珍已先起海上他盜擁兵據地寇掠甚
 衆天下大亂十二年春二月定遠人郭子興與其黨孫
 德崖等起兵濠州元將徹里不花憚不敢攻而日俘良

民以邀賞太祖時年二十四謀避兵卜於神去畱皆不吉乃曰得毋當舉大事乎卜之吉大喜遂以閏三月甲戌朔入濠見子興子興奇其狀貌畱爲親兵戰輒勝遂妻以所撫馬公女卽高皇后也子興與德崖齟齬太祖屢調護之秋九月元兵復徐州李二走死彭大趙均用奔濠德崖等納之子興禮大而易均用均用怨之德崖遂與謀伺子興出執而械諸孫氏將殺之太祖方在淮北聞難馳至訴於彭大大怒呼兵以行太祖亦甲而擁盾發屋出子興破械使人負以歸遂免是冬元將賈魯圍濠太祖與子興力拒之十三年春賈魯死圍解太祖

收里中兵得七百人子興喜署爲鎮撫時彭趙所部暴橫子興弱太祖度無足與共事乃以兵屬他將獨與徐達湯和費聚等南畧定遠計降驢牌寨民兵三千與俱東夜襲元將張知院於橫澗山收其卒二萬道遇定遠人李善長與語大悅遂與俱攻滁州下之是年張士誠據高郵自稱誠王十四年冬十月元丞相脫脫大敗士誠於高郵分兵圍六合太祖曰六合破滁且不免與耿再成軍瓦梁壘救之力戰衛老弱還滁元兵尋大至攻滁太祖設伏誘敗之然度元兵勢盛且再至乃還所獲馬遣父老具牛酒謝元將曰守城備他盜耳奈何舍巨

寇戮良民元兵引去城賴以完脫脫旣破士誠軍聲大振會中讒遽解兵柄江淮亂益熾十五年春正月子興用太祖計遣張天祐等拔和州檄太祖總其軍太祖慮諸將不相下秘其檄期旦日會廳事時席尚右諸將先入皆踞右太祖故後至就左比視事剖決如流衆瞠目不能發一語始稍稍屈議分工甓城期三日太祖工竣諸將皆後於是始出檄南面坐曰奉命總諸公兵今甓城皆後期如軍法何諸將皆惶恐謝乃搜軍中所掠婦女縱還家民大悅元兵十萬攻和拒守三月食且盡而太子禿堅樞密副使絆住馬民兵元帥陳埜先分屯新

塘高望雞籠山以絕餉道太祖率衆破之元兵皆走渡江三月郭子興卒時劉福通迎立韓山童子林兒於亳國號宋建元龍鳳檄子興子天叙爲都元帥張天祐太祖爲左右副元帥太祖慨然曰大丈夫寧能受制於人耶遂不受然念林兒勢盛可倚藉乃用其年號以令軍中夏四月常遇春來歸五月太祖謀渡江無舟會巢湖帥廖永安俞通海以水軍千艘來附太祖大喜往撫其衆而元中丞蠻子海牙扼銅城閘馬場河諸隘巢湖舟師不得出忽大雨太祖喜曰天助我也遂乘水漲從小港縱舟還因擊海牙於峪溪口大敗之遂定計渡江諸

將請直趨集慶太祖曰取集慶必自采石始采石重鎮
守必固牛渚前臨大江彼難爲備可必克也六月乙卯
乘風引帆直達牛渚常遇春先登拔之采石兵亦潰緣
江諸壘悉附諸將以和州饑爭取資糧謀歸太祖謂徐
達曰渡江幸捷若舍而歸江東非吾有也乃悉斷舟纜
放急流中謂諸將曰太平甚近當與公等取之遂乘勝
拔太平執萬戶納哈出總管靳義赴水死太祖曰義士
也禮葬之揭榜禁剽掠有卒違令斬以徇軍中肅然改
路曰府置太平興國翼元帥府自領元帥事召陶安參
幕府事李習爲知府時太平四面皆元兵右丞阿魯灰

中丞蠻子海牙等嚴師截姑孰口陳埜先水軍帥康茂才以數萬衆攻城太祖遣徐達鄧愈湯和逆戰別將潛出其後來擊之擒埜先并降其衆阿魯灰等引去秋九月郭天叙張天祐攻集慶埜先叛二人皆戰死於是子興部將盡歸太祖矣埜先尋爲民兵所殺從子兆先收其衆屯方山與海牙犄角以窺太平冬十二月壬子釋納哈出北歸十六年春二月丙子大破海牙於采石三月癸未進攻集慶擒兆先降其衆三萬六千人皆疑懼不自保太祖擇驍健者五百人入衛解甲酣寢達旦衆心始安庚寅再敗元兵於蔣山元御史大夫福壽力戰

死之蠻子海牙遁歸張士誠康茂才降太祖入城悉召
官吏父老諭之曰元政瀆擾干戈蜂起我來爲民除亂
耳其各安堵如故賢士吾禮用之舊政不便者除之吏
毋貪暴殃吾民民乃大喜過望改集慶路爲應天府辟
夏煜孫炎楊憲等十餘人葬御史大夫福壽以旌其忠
當是時元將定定扼鎮江別不華楊仲英屯寧國青衣
軍張明鑑據揚州八思爾不花駐徽州石抹宜孫守處
州其弟厚孫守婺州宋伯顏不花守衢州而池州已爲
徐壽輝將所據張士誠自淮東陷平江轉掠浙西太祖
既定集慶慮士誠壽輝强江左浙右諸郡爲所并於是

遣徐達攻鎮江拔之定定戰死夏六月鄧愈克廣德秋七月己卯諸將奉太祖爲吳國公置江南行中書省自總省事置僚佐貽書張士誠士誠不報引兵攻鎮江徐達敗之進圍常州不下九月戊寅如鎮江謁孔子廟遣儒士告諭父老勸農桑尋還應天十七年春二月耿炳文克長興三月徐達克常州夏四月丁卯自將攻寧國取之別不華降五月上元寧國句容獻瑞麥六月趙繼祖克江陰秋七月徐達克常熟胡大海克徽州八思爾不花遁冬十月常遇春克池州繆大亨克揚州張明鑑降十二月己丑釋囚是年徐壽輝將明玉珍據重慶路

十八年春二月乙亥以康茂才爲營田使三月己酉錄
囚鄧愈克建德路夏四月徐壽輝將陳友諒遣趙普勝
陷池州是月友諒據龍興路五月劉福通破汴梁迎韓
林兒都之初福通遣將分道四出破山東寇秦晉掠幽
薊中原大亂太祖故得次第畧定江表所過不殺收召
才雋由是人心日附冬十二月胡大海攻婺州久不下
太祖自將往擊之石抹宜孫遣將率車師由松溪來援
太祖曰道陜車戰適取敗耳命胡德濟迎戰於梅花門
大破之婺州降執厚孫先一日城中人望見城西五色
雲如車蓋以爲異及是乃知爲太祖駐兵地入城發粟

振貧民改州爲寧越府辟范祖幹葉儀許元等十三人分直講經史戊子遣使招諭方國珍十九年春正月乙巳太祖謀取浙東未下諸路戒諸將曰克城以武戡亂以仁吾比入集慶秋毫無犯故一舉而定每聞諸將得一城不妄殺輒喜不自勝夫師行如火不戢將燎原爲將能以不殺爲武豈惟國家之利子孫實受其福庚申胡大海克諸暨是月命寧越知府王宗顯立郡學三月甲午赦大逆以下丁巳方國珍以溫台慶元來獻遣其子關爲質不受夏四月俞通海等復池州時耿炳文守長興吳良守江陰湯和守常州皆數敗士誠兵太祖以

故久畱寧越徇浙東六月壬戌還應天秋八月元察罕
帖木兒復汴梁福通以林兒退保安豐九月常遇春克
衢州擒宋伯顏不花冬十月遣夏煜授方國珍行省平
章國珍以疾辭十一月壬寅胡大海克處州石抹宜孫
遁時元守兵單弱且聞中原亂人心離散以故江左浙
右諸郡兵至皆下遂西與友諒隣二十年春二月元福
建行省叅政袁天祿以福寧降三月戊子徵劉基宋濂
章溢葉琛至夏五月徐達常遇春敗陳友諒於池州閏
月丙辰友諒陷太平守將朱文遜院判花雲王鼎知府
許瑗死之未幾友諒弑其主徐壽輝自稱皇帝國號漢

盡有江西湖廣地約士誠合攻應天應天大震諸將議先復太平以牽之太祖曰不可彼居上游舟師十倍於我猝難復也或請自將迎擊太祖曰不可彼以偏師綴我而全軍趨金陵順流半日可達吾步騎急難引還百里趨戰兵法所忌非策也乃馳諭胡大海擣信州牽其後而令康茂才以書給友諒令速來友諒果引兵東於是常遇春伏石灰山徐達陣南門外楊璟屯大勝港張德勝等以舟師出龍江關太祖親督軍廬龍山乙丑友諒至龍灣衆欲戰太祖曰天且雨趣食乘雨擊之須臾果大雨士卒競奮雨止合戰水陸夾擊大破之友諒乘

別舸走遂復太平下安慶而大海亦克信州初太祖令
茂才給友諒李善長以爲疑太祖曰二寇合吾首尾受
敵惟速其來而先破之則士誠膽落矣已而士誠兵竟
不出丁卯置儒學提舉司以宋濂爲提舉遣子標受經
學六月耿再成敗石抹宜孫於慶元宜孫戰死遣使祭
之秋九月徐壽輝舊將歐普祥以袁州降冬十二月復
遣夏煜以書諭國珍二十一年春二月甲申立鹽茶課
乙亥置寶源局三月丁丑改樞密院爲大都督府元將
薛顯以泗州降戊寅國珍遣使來謝飾金玉馬鞍以獻
却之曰今有事四方所需者人材所用者粟帛寶玩非

所好也秋七月友諒將張定邊陷安慶八月遣使於元平章察罕帖木兒時察罕平山東降田豐軍聲大振故太祖與通好會察罕方攻益都未下太祖乃自將舟師征陳友諒戊戌克安慶友諒將丁普郎傳友德迎降壬寅次湖口追敗友諒於江州克其城友諒奔武昌分徇南康建昌饒蘄黃廣濟皆下冬十一月己未克撫州二十二年春正月友諒江西行省丞相胡廷瑞以龍興降乙卯如龍興改爲洪都府謁孔子廟告諭父老除陳氏苛政罷諸軍需存恤貧無告者民大悅袁瑞臨江吉安相繼下二月還應天鄧愈畱守洪都辛未降人蔣英殺

金華守將胡大海郎中王愷死之英叛降張士誠處州
降人李祐之聞變亦殺行樞密院判耿再成反都事孫
炎知府王道同元帥朱文剛死之三月癸亥降人祝宗
康泰反陷洪都鄧愈走應天知府葉琛都事萬思誠死
之是月明玉珍稱帝於重慶國號夏夏四月己卯邵榮
復處州甲午徐達復洪都五月丙午朱文正趙德勝鄧
愈鎮洪都六月戊寅察罕以書來報畱我使人不遣察
罕尋爲田豐所殺秋七月丙辰平章邵榮參政趙繼祖
謀逆伏誅冬十二月元遣尚書張昶航海至慶元授太
祖江西行省平章政事不受察罕子擴廓帖木兒致書

歸使者二十三年春正月丙寅遣汪河報之二月壬申命將士屯田積穀是月友諒將張定邊陷饒州士誠將呂珍破安豐殺劉福通三月辛丑太祖自將救安豐珍敗走以韓林兒歸滁州乃還應天夏四月壬戌友諒大舉兵圍洪都乙丑諸全守將謝再興叛附於士誠五月築禮賢館友諒分兵陷吉安參將劉齊知府朱叔華死之陷臨江同知趙天麟死之陷無爲州知州董曾死之秋七月癸酉太祖自將救洪都癸未次湖口先伏兵涇江口及南湖觜遏友諒歸路檄信州兵守武陽渡友諒聞太祖至解圍逆戰於鄱陽湖友諒兵號六十萬聯巨

舟爲陣樓櫓高十餘丈綿亘數十里旌旂戈盾望之如山丁亥遇於康郎山太祖分軍十一隊以禦之戊子合戰徐達擊其前鋒俞通海以火礮焚其舟數十殺傷畧相當友諒驍將張定邊直犯太祖舟舟膠於沙不得退危甚常遇春從旁射中定邊通海復來援舟驟進水湧太祖舟乃得脫己丑友諒悉巨艦出戰諸將舟小仰攻不利有怖色太祖親麾之不前斬退縮者十餘人人皆殊死戰會日晡大風起東北乃命敢死士操七舟實火藥蘆葦中縱火焚友諒舟風烈火熾烟燄漲天湖水盡赤友諒兵大亂諸將鼓噪乘之斬首二千餘級焚溺死

者無算友諒氣奪辛卯復戰友諒復大敗於是斂舟自守不敢更戰壬辰太祖移軍扼左蠡友諒亦退保渚磯相持三日其左右二金吾將軍皆降友諒勢益蹙忿甚盡殺所獲將士而太祖則悉還所俘傷者傳以善藥且祭其親戚諸將陣亡者八月壬戌友諒食盡趨南湖觜爲南湖軍所遏遂突湖口太祖邀之順流搏戰及於涇江涇江軍復遮擊之友諒中流矢死張定邊以其子理奔武昌九月還應天論功行賞先是太祖救安豐劉基諫不聽至是謂基曰我不當有安豐之行使友諒乘虛直擣應天大事去矣乃頓兵南昌不亡何待友諒亡天

下不難定也壬午自將征陳理是月張士誠自稱吳王
冬十月壬寅圍武昌分徇湖北諸路皆下十二月丙申
還應天常遇春畱督諸軍二十四年春正月丙寅朔李
善長等率羣臣勸進不允固請乃卽吳王位建百官以
善長爲右相國徐達爲左相國常遇春俞通海爲平章
政事諭之曰立國之初當先正紀綱元氏闇弱威福下
移馴至於亂今宜鑒之立子標爲世子二月乙未復自
將征武昌陳理降漢沔荆岳皆下三月乙丑還應天丁
卯置起居注庚午罷諸翼元帥府置十七衛親軍指揮
使司命中書省辟文武人材夏四月建祠祀死事丁普

郎等於康郎山趙德勝等於南昌秋七月丁丑徐達克
廬州戊寅常遇春徇江西八月戊戌復吉安遂圍贛州
達徇荆湘諸路九月甲申下江陵夷陵潭歸皆降冬十
二月庚寅達克辰州遣別將下衡州二十五年春正月
己巳徐達下寶慶湖湘平常遇春克贛州熊天瑞降遂
趨南安招諭嶺南諸路下韶州南雄甲申如南昌執大
都督朱文正以歸數其罪安置桐城二月己丑福建行
省平章陳友定侵處州參軍胡深擊敗之遂下浦城丙
午士誠將李伯昇攻諸全之新城李文忠大敗之夏四
月庚寅常遇春徇襄漢諸路五月乙亥克安陸乙卯下

襄陽六月壬子朱亮祖胡深攻建寧戰於城下深被執死之秋七月令從渡江士卒被創廢疾者養之死者贍其妻子九月丙辰建國子學冬十月戊戌下令討張士誠是時士誠所據南至紹興北有通泰高郵淮安濠泗又北至於濟寧乃命徐達常遇春等先規取淮東閏月圍泰州克之十一月張士誠寇宜興徐達擊敗之遂自宜興還攻高郵二十六年春正月癸未士誠窺江陰太祖自將救之士誠遁康茂才追敗之於浮子門太祖還應天二月明玉珍死子昇自立三月丙申令中書嚴選舉徐達克高郵夏四月乙卯襲破士誠將徐義水軍於

淮安義遁梅思祖以城降濠徐宿三州相繼下淮東平
甲子如濠州省墓置守塚二十家賜故人汪文劉英粟
帛置酒召父老飲極歡曰吾去鄉十有餘年艱難百戰
乃得歸省墳墓與父老子弟復相見今苦不得久畱歡
聚爲樂父老幸教子弟孝弟力田母遠賈濱淮郡縣尚
苦寇掠父老善自愛令有司除租賦皆頓首謝辛未徐
達克安豐分兵敗擴廓於徐州夏五月壬午至自濠庚
寅求遺書秋八月庚戌改築應天城作新宮鍾山之陽
辛亥命徐達爲大將軍常遇春爲副將軍帥師二十萬
討張士誠御戟門誓師曰城下之日毋殺掠毋毀廬舍

母發邱壟士誠母葬平江城外母侵毀旣而召問達遇
春用兵當何先遇春欲直擣平江太祖曰湖州張天騏
杭州潘原明爲士誠臂指平江窮蹙兩人悉力赴援難
以取勝不若先攻湖州使疲於奔命羽翼旣披平江勢
孤立破矣甲戌敗張天騏於湖州士誠親率兵來援復
敗之於皂林九月乙未李文忠攻杭州冬十月壬子遇
春敗士誠兵於烏鎮十一月甲申張天騏降辛卯李文
忠下餘杭潘原明降旁郡悉下癸卯圍平江十二月韓
林兒卒以明年爲吳元年建廟社宮室祭告山川所司
進宮殿圖命去雕琢奇麗者是歲元擴廓帖木兒與李

思齊張良弼構怨屢相攻擊朝命不行中原民益困二十七年春正月戊戌諭中書省曰東南久罹兵革民生凋敝吾甚憫之且太平應天諸郡吾渡江開創地供億煩勞久矣今比戶空虛有司急催科重困吾民將何以堪其賜太平田租二年應天鎮江寧國廣德各一年二月丁未傅友德敗擴廓將李二於徐州執之三月丁丑始設文武科取士夏四月方國珍陰遣人通擴廓及陳友定移書責之五月己亥初置翰林院是月以旱減膳素食復徐宿濠泗壽邳東海安東襄陽安陸及新附地田租三年六月戊辰大雨羣臣請復膳太祖曰雖雨傷

禾已多其賜民今年田租癸酉命朝賀罷女樂秋七月
丙子給府州縣官之任費賜綺帛及其父母妻長子有
差著爲令己丑雷震宮門獸吻赦罪囚庚寅遣使責方
國珍貢糧八月癸丑園丘方丘社稷壇成九月甲戌太
廟成朱亮祖帥師討國珍戊寅詔曰先王之政罪不及
孥自今除大逆不道毋連坐辛巳徐達克平江執士誠
吳地平戊戌遣使致書於元主送其宗室神保大王等
北還辛丑論平吳功封李善長宣國公徐達信國公常
遇春鄂國公將士賜賚有差朱亮祖克台州癸卯新宮
成冬十月甲辰遣起居注吳琳魏觀以幣求遺賢於四

方丙午令百官禮儀尚左改李善長左相國徐達右相
國辛亥祀元臣余闕於安慶李黼於江州壬子置御史
臺癸丑湯和爲征南將軍吳禎副之討國珍甲寅定律
令戊午正郊社太廟雅樂庚申召諸將議北征太祖曰
山東則王宣反側河南則擴廓跋扈關隴則李思齊張
思道梟張猜忌元祚將亡中原塗炭今將北伐拯生民
於水火何以決勝遇春對曰以我百戰之師敵彼久逸
之卒直擣元都破竹之勢也太祖曰元建國百年守備
必固懸軍深入餽餉不前援兵四集危道也吾欲先取
山東撤彼屏蔽移兵兩河破其藩籬拔潼關而守之扼

其戶檻天下形勝入我掌握然後進兵元都勢孤援絕
不戰自克鼓行而西雲中九原關隴可席卷也諸將皆
曰善甲子徐達爲征虜大將軍常遇春爲副將軍帥師
二十五萬由淮入河北取中原胡廷瑞爲征南將軍何
文輝爲副將軍取福建湖廣行省平章楊璟左丞周德
興參政張彬取廣西己巳朱亮祖克溫州十一月辛巳
湯和克慶元方國珍遁入海壬午徐達克沂州斬王宣
己丑廖永忠爲征南副將軍自海道會和討國珍乙未
頒大統曆辛丑徐達克益都十二月甲辰頒律令丁未
方國珍降浙東平張興祖下東平克東州縣相繼降己

酉徐達下濟南胡廷瑞下邵武癸丑李善長帥百官勸
進表三上乃許甲子告於上帝庚午湯和廖永忠由海
道克福州

明史卷一終

明史卷二

本紀第二

總裁官總理事務

經筵講官少保兼太子太保保和殿大學士兼管吏部戶部堂書事加六級張廷玉等奉

敕修

太祖二

洪武元年春正月乙亥祀天地於南郊卽皇帝位定有天下之號曰明建元洪武追尊高祖考曰元皇帝廟號德祖曾祖考曰恒皇帝廟號懿祖祖考曰裕皇帝廟號熙祖皇考曰淳皇帝廟號仁祖妣皆皇后立妃馬氏爲皇后世子標爲皇太子以李善長徐達爲左右丞相諸功臣進爵有差丙子頒卽位詔於天下追封皇伯考以

下皆爲王辛巳李善長徐達等兼東宮官甲申遣使覈浙西田賦壬辰胡廷瑞克建寧庚子鄧愈爲征戍將軍畧南陽以北州郡湯和克延平執元平章陳友定福建平是月天下府州縣官來朝諭曰天下始定民財力俱困要在休養安息惟廉者能約己而利人勉之二月壬寅定郊社宗廟禮歲必親祀以爲常癸卯湯和提督海運廖永忠爲征南將軍朱亮祖副之由海道取廣東丁未以太牢祀先師孔子於國學戊申祀社稷壬子詔衣冠如唐制癸丑常遇春克東昌山東平甲寅楊璟克寶慶三月辛未詔儒臣修女誡戒后妃母預政壬申周德

興克全州丁酉鄧愈克南陽己亥徐達徇汴梁左君弼
降夏四月辛丑蘄州進竹簾却之命四方毋妄獻廖永
忠師至廣州元守臣何眞降廣東平丁未祿享太廟戊
申徐達常遇春大破元兵於洛水北遂圍河南梁王阿
魯溫降河南平丁巳楊璟克永州甲子幸汴梁丙寅馮
勝克潼關李思齊張思道遁五月己卯廖永忠下梧州
潯貴容鬱林諸州皆降辛卯改汴梁路爲開封府六月
庚子徐達朝行在甲辰海南海北諸道降壬戌楊璟朱
亮祖克靖江秋七月戊子廖永忠下象州廣西平庚寅
振恤中原貧民辛卯將還應天諭達等曰中原之民久

爲羣雄所苦流離相望故命將北征拯民水火元祖宗
功德在人其子孫罔恤民隱天厭棄之君則有罪民復
何辜前代革命之際肆行屠戮違天虐民朕實不忍諸
將克城毋肆焚掠妄殺人元之宗戚咸俾保全庶幾上
答天心下慰人望以副朕伐罪安民之意不恭命者罰
無赦丙申命馮勝畱守開封閏月丁未至自開封己酉
徐達會諸將兵於臨清壬子常遇春克德州丙寅克通
州元帝趨上都是月徵天下賢才爲守令免吳江廣德
太平寧國滁和被災田租八月己巳以應天爲南京開
封爲北京庚午徐達入元都封府庫圖籍守宮門禁士

卒侵暴遣將巡古北口諸隘壬申以京師火四方水旱
詔中書省集議便民事丁丑定六部官制御史中丞劉
基致仕己卯赦殊死以下將士從征者恤其家逋逃許
自首新克州郡毋妄殺輸賦道遠者官爲轉運災荒以
實聞免鎮江租稅避亂民復業者聽墾荒地復三年衍
聖公襲封及授曲阜知縣竝如前代制有司以禮聘致
賢士學校毋事虛文平刑毋非時決囚除書籍田器稅
民間逋負免徵蒙古色目人有才能者許擢用鰥寡孤
獨廢疾者存恤之民年七十以上一子復他利害當興
革不在詔內者有司具以聞壬午幸北京改大都路曰

北平府徵元故臣癸未詔徐達常遇春取山西甲午放
元宮人九月癸亥詔曰天下之治天下之賢共理之今
賢士多隱巖穴豈有司失於敦勸歟朝廷疎於禮待歟
抑朕寡昧不足致賢將在位者壅蔽使不上達歟不然
賢士大夫幼學壯行豈甘沒世而已哉天下甫定朕願
與諸儒講明治道有能輔朕濟民者有司禮遣乙丑常
遇春下保定遂下真定冬十月庚午馮勝湯和下懷慶
澤潞相繼下丁丑至自北京戊寅以元都平詔天下十
一月己亥遣使分行天下訪求賢才庚子始祀上帝於
圓丘癸亥詔劉基還十二月丁卯徐達克太原擴廓帖

木兒走甘肅山西平己巳置登聞鼓壬辰以書諭明昇
二年春正月乙巳立功臣廟於雞籠山丁未享太廟庚
戌詔曰朕淮右布衣因天下亂率衆渡江保民圖治今
十有五年荷天眷祐悉皆戡定用是命將北征齊魯之
民饋糧給軍不憚千里朕軫厥勞已免元年田租遭旱
民未蘇其更賜一年頃者大軍平燕都下晉冀民被兵
燹困征斂北平燕南河東山西今年田租亦與蠲免河
南諸郡歸附久欲惠之西北未平師過其地是以未遑
今晉冀平矣西抵潼關北界大河南至唐鄧光息今年
稅糧悉除之又詔曰應天太平鎮江宣城廣德供億浩

穰去歲蠲租遇旱惠不及下其再免諸郡及無爲州今年租稅庚申常遇春取大同是月倭寇山東濱海郡縣二月丙寅朔詔修元史壬午耕藉田三月庚子徐達至奉元張思道遁振陝西饑戶米三石丙午常遇春至鳳翔李思齊奔臨洮夏四月丙寅遇春還師北平己巳諸王子受經於博士孔克仁令功臣子弟入學乙亥編祖訓錄定封建諸王之制徐達下鞏昌丙子賜秦隴新附州縣稅糧丁丑馮勝至臨洮李思齊降乙酉徐達襲破元豫王於西寧五月甲午朔日有食之丁酉徐達下平涼延安張良臣以慶陽降尋叛癸卯始祀地於方丘六

月己卯常遇春克開平元帝北走壬午封陳日煒爲安
南國王秋七月己亥鄂國公常遇春卒於軍詔李文忠
領其衆辛亥擴廓帖木兒遣將破原州涇州辛酉馮勝
擊走之丙辰明昇遣使來八月丙寅元兵攻大同李文
忠擊敗之己巳定內侍官制諭吏部曰內臣但備使令
毋多人古來若輩擅權可爲鑒戒馭之之道當使之畏
法勿令有功有功則驕恣矣癸酉元史成丙子封王顥
爲高麗國王癸未徐達克慶陽斬張良臣陝西平是月
命儒臣纂禮書九月辛丑召徐達湯和還馮勝畱總軍
事癸卯以臨濠爲中都戊午征南師還冬十月壬戌遣

楊璟諭明昇甲戌甘露降於鍾山羣臣請告廟不許辛卯詔天下郡縣立學是月遣使貽元帝書十一月乙巳祀上帝於園丘以仁祖配十二月甲戌封阿答阿者爲占城國王甲申振西安諸府饑戶米二石己丑大賚平定中原及征南將士庚寅擴廓帖木兒攻蘭州指揮于光死之是年占城安南高麗入貢

三年春正月癸巳徐達爲征虜大將軍李文忠馮勝鄧愈湯和副之分道北征二月癸未追封郭子興滁陽王戊子詔求賢才可任六部者是月李文忠下興和進兵察罕腦兒執元平章竹貞三月庚寅免南畿河南山東

北平浙東江西廣信饒州今年田租夏四月乙丑封皇子棧爲秦王櫚晉王棣燕王櫟吳王楨楚王樽齊王梓潭王杞趙王檀魯王從孫守謙靖江王徐達大破擴廓帖木兒於沈兒峪盡降其衆擴廓走和林丙戌元帝崩於應昌子愛猷識理達臘嗣是月慈利土官覃垕作亂五月己丑徐達取興元分遣鄧愈招諭吐蕃丁酉詔守令舉學識篤行之士己亥設科取士甲辰李文忠克應昌元嗣君北走獲其子買的里八剌降五萬餘人窮追至北慶州不及而還丁未詔行大射禮戊申祀地於方丘以仁祖配辛亥徐達下興元鄧愈克河州丁巳詔開

國時將帥無嗣者祿其家是月旱齋戒后妃親執爨皇太子諸王饋於齋所六月戊午朔素服草屨步禱山川壇露宿凡三日還齋於西廡辛酉賚將士省獄囚命有司訪求通經術明治道者壬戌大雨壬申李文忠捷奏至命仕元者勿賀諡元主曰順帝癸酉買的里八剌至京師羣臣請獻俘帝曰武王伐殷用之乎省臣以唐太宗嘗行之對帝曰太宗是待王世充耳若遇隋之子孫恐不爾也遂不許又以捷奏多侈辭謂宰相曰元主中國百年朕與卿等父母皆賴其生養奈何爲此浮薄之言亟改之乙亥封買的里八剌爲崇禮侯丙子告捷於

南郊丁丑告太廟詔示天下辛巳徙蘇州松江嘉興湖州杭州民無業者田臨濠給資糧牛種復三年是月倭寇山東浙江福建濱海州縣秋七月丙辰明昇將吳友仁寇漢中參政傅友德擊却之中書左丞楊憲有罪誅八月乙酉遣使瘞中原遺骸冬十月丙辰詔儒士更直午門爲武臣講經史癸亥周德興爲征南將軍討覃屋屋遁辛巳貽元嗣君書十一月壬辰北征師還甲午告武成於郊廟丙申大封功臣進李善長韓國公徐達魏國公封李文忠曹國公馮勝宋國公鄧愈衛國公常遇春子茂鄭國公湯和等侯者二十八人已亥設壇親祭

戰沒將士庚戌有事於圜丘辛亥詔戶部置戶籍戶帖
歲計登耗以聞著爲令乙卯封中書右丞汪廣洋忠勤
伯御史中丞劉基誠意伯十二月癸亥復貽元嗣君書
竝諭和林諸部甲子建奉先殿庚午遣使祭歷代帝王
陵寢竝加修葺己卯賜勲臣田壬午以正月至是月日
中屢有黑子詔廷臣言得失是年占城瓜哇西洋入貢
四年春正月丙戌李善長罷汪廣洋爲右丞相丁亥中
山侯湯和爲征西將軍江夏侯周德興德慶侯廖永忠
副之率舟師由瞿塘潁川侯傅友德爲征虜前將軍濟
寧侯顧時副之率步騎由秦隴伐蜀魏國公徐達練兵

北平戊子衛國公鄧愈督餉給征蜀軍庚寅建郊廟於
中都丁未詔設科取士連舉三年嗣後三年一舉戊申
免山西旱災田租二月甲戌幸中都壬午至自中都元
平章劉益以遼東降是月蠲太平鎮江寧國田租三月
乙酉朔始策試天下貢士賜吳伯宗等進士及第出身
有差乙巳徙山後民萬七千戶屯北平丁未誠意伯劉
基致仕夏四月丙戌傅友德克階州文隆綿三州相繼
下五月免江西浙江秋糧六月壬午傅友德克漢州辛
卯廖永忠克夔州戊戌明昇將丁世貞破文州守將朱
顯忠死之癸卯湯和至重慶明昇降戊申倭寇膠州是

月徙山後民三萬五千戶於內地又徙沙漠遺民三萬二千戶屯田北平秋七月辛亥徐達練兵山西辛酉傳友德下成都四川平乙丑明昇至京師封歸義侯八月甲午免中都淮揚及泰滁無爲田租己酉振陝西饑是月高州海寇亂通判王名善死之九月庚戌朔日有食之冬十月丙申征蜀師還十一月丙辰有事於園丘庚申命官吏犯贓者罪勿貸是月免陝西河南被災田租十二月徐達還是年安南淳泥高麗三佛齊暹羅日本眞臘入貢

五年春正月癸丑待制王禕使雲南詔諭元梁王把匝

刺瓦爾密禕至不屈死乙丑徙陳理明昇於高麗甲戌
魏國公徐達爲征虜大將軍出雁門趨和林曹國公李
文忠爲左副將軍出應昌宋國公馮勝爲征西將軍取
甘肅征擴廓帖木兒靖海侯吳禎督海運餉遼東衛國
公鄧愈爲征南將軍江夏侯周德興江陰侯吳良副之
分道討湖南廣西洞蠻二月丙戌安南陳叔明弑其主
日熒自立遣使入貢却之三月丁卯都督僉事藍玉敗
擴廓於土刺河夏四月己卯振濟南萊州饑戊戌始行
鄉飲酒禮庚子鄧愈平散毛諸洞蠻五月壬子徐達及
元兵戰於嶺北敗績是月詔曰天下大定禮儀風俗不

可不正諸遭亂爲人奴隸者復爲民凍餒者里中富室
假貸之孤寡殘疾者官養之母失所鄉黨論齒相見揖
拜母違禮婚姻毋論財喪事稱家有無母惑陰陽拘忌
停柩暴露流民復業者各就丁力耕種毋以舊田爲限
僧道齋醮雜男女恣飲食有司嚴治之閩粵豪家母闔
人子爲火者犯者抵罪六月丙子定宦官禁令丁丑定
宮官女職之制戊寅馮勝克甘肅追敗元兵於瓜沙州
癸巳定六部職掌及歲終考績法壬寅吳良平靖州蠻
甲辰李文忠敗元兵於阿魯渾河宣寧侯曹良臣戰沒
乙巳作鐵榜誡功臣是月振山東饑免被災郡縣田租

秋七月丙辰湯和及元兵戰於斷頭山敗績八月丙申
吳良平五開古州諸蠻甲辰元兵犯雲內同知黃理死
之九月戊午周德興平婪鳳安田諸蠻冬十月丁酉馮
勝師還是月免應天太平鎮江寧國廣德田租十一月
辛酉有事於圜丘甲子征南師還壬申納哈出犯遼東
是月召徐達李文忠還十二月甲戌詔以農桑學校課
有司辛巳命百官奏事啓皇太子庚子鄧愈爲征西將
軍征吐番壬寅貽元嗣君書是年瑣里占城高麗琉球
烏斯藏入貢高麗貢使再至諭自後三年一貢

六年春正月甲寅謫汪廣洋爲廣東參政二月乙未諭

暫罷科舉察舉賢才壬寅命御史及按察使考察有司
三月癸卯朔日有食之頒昭鑒錄訓誡諸王戊申大閱
壬子徐達爲征虜大將軍李文忠馮勝鄧愈湯和副之
備邊山西北平甲子指揮使於顯爲總兵官備倭夏四
月己丑令有司上山川險易圖六月壬午盱眙獻瑞麥
薦宗廟壬辰擴廓帖木兒遣兵攻雁門指揮吳均擊却
之是月免北平河間河南開封延安汾州被災田租秋
七月壬寅命戶部稽渡江以來各省水旱災傷分數優
恤之壬子胡惟庸爲右丞相八月乙亥詔祀三皇及歷
代帝王冬十月辛巳召徐達馮勝還十一月壬子擴廓

帖木兒犯大同徐達遣將擊敗之達仍畱鎮甲子遣兵部尚書劉仁振真定饑丙寅冬至帝不豫改卜郊閏月乙亥錄故功臣子孫未嗣者二百九人壬午有事於圜丘庚寅頒定大明律是年暹羅高麗占城真臘三佛齊入貢命安南陳叔明權知國事

七年春正月甲戌都督僉事王簡王誠平章李伯昇屯田河南山東北平靖海侯吳禎爲總兵官都督於顯副之巡海捕倭二月丁酉朔日有食之戊午修曲阜孔子廟設孔顏孟三氏學是月平陽太原汾州歷城汲縣旱蝗竝免租稅夏四月己亥都督藍玉敗元兵於白酒泉

遂拔興和壬寅金吾指揮陸齡討永道諸州蠻平之五月丙子免眞定等四十二府州縣被災田租辛巳振蘇州饑民三十萬戶癸巳減蘇松嘉湖極重田租之半六月陝西平涼延安靖寧鄜州雨雹山西山東北平河南蝗竝蠲田租秋七月甲子文忠破元兵於大寧高州壬申倭寇登萊八月甲午朔祀歷代帝王廟辛丑詔軍士陣歿父母妻子不能自存者官爲存養百姓避兵離散或客死遺老幼竝資遣還遠宦卒官妻子不能歸者有司給舟車資送庚申振河間廣平順德眞定饑蠲租稅九月丁丑遣崇禮侯買的里八剌歸遺元嗣君書冬十

一月壬戌納哈出犯遼陽千戶吳壽擊走之辛未有事於園丘十二月戊戌召鄧愈湯和還是年阿難功德國暹羅琉球三佛齊烏斯藏撒里畏兀兒入貢

八年春正月辛未增祀雞籠山功臣廟一百八人癸酉命有司察窮民無告者給屋舍衣食辛巳鄧愈湯和等十三人屯戍北平陝西河南丁亥詔天下立社學是月河決開封發民夫塞之二月甲午宥雜犯死罪以下及官犯私罪者謫鳳陽輸作屯種贖罪癸丑耕藉田召徐達李文忠馮勝還傅友德等畱鎮北平三月辛酉立鈔法辛巳罷寶源局鑄錢夏四月辛卯幸中都丁巳至自

中都免彰德大名臨洮平涼河州被災田租罷營中都
致仕誠意伯劉基卒五月己巳永嘉侯朱亮祖偕傅友
德鎮北平六月壬寅指揮同知胡汝平貴州蠻秋七月
己未朔日有食之辛酉改作太廟壬戌召傅友德朱亮
祖還李文忠顧時鎮山西北平戊辰詔百官奔父母喪
不俟報京師地震丁丑免應天太平寧國鎮江及蘄黃
諸府被災田租八月己酉元擴廓帖木兒卒冬十月丁
亥詔舉富民素行端潔達時務者壬子命皇太子諸王
講武中都十一月丁丑有事於圜丘十二月戊子京師
地震甲寅遣使振蘇州湖州嘉興松江常州太平寧國

杭州水災是月納哈出犯遼東指揮馬雲葉旺大敗之
是年撒里高麗占城暹羅日本瓜哇三佛齊入貢

九年春正月中山侯湯和潁川侯傅友德都督僉事藍
玉王弼中書右丞丁玉備邊延安三月己卯詔曰比年
西征燉煌北伐沙漠軍需甲仗皆資山陝又以秦晉二
府宮殿之役重困吾民平定以來閭閻未息國都始建
土木屢興畿輔旣極煩勞外郡疲於轉運今蓄儲有餘
其淮揚安徽池五府及山西陝西河南福建江西浙江
北平湖廣今年租賦悉免之夏四月庚戌京師自去年
八月不雨是日始雨五月癸酉自庚戌雨至是日始霽

六月甲午改行中書省爲承宣布政使司辛丑李文忠還秋七月癸丑朔日有食之是月蠲蘇松嘉湖水災田租振永平旱災元將伯顏帖木兒犯延安傅友德敗降之八月己酉遣官省歷代帝王陵寢禁芻牧置守陵戶忠臣烈士祠有司以時葺治分遣國子生修嶽鎮海瀆祠西番朵兒只巴寇罕東河州指揮甯正擊走之閏九月庚寅以災異詔求直言冬十月己未太廟成自是行合享禮丙子命秦晉燕吳楚齊諸王治兵鳳陽十一月壬午有事於圜丘戊子徙山西及眞定民無產者田鳳陽十二月甲寅振畿內浙江湖北水災己卯遣都督同

知沐英乘傳詣陝西問民疾苦是年覽邦琉球安南日本烏斯藏高麗入貢

十年春正月辛卯以羽林等衛軍益秦晉燕三府護衛是春振蘇松嘉湖水災夏四月己酉鄧愈爲征西將軍沐英爲副將軍率師討吐番大破之是月振太平寧國及宜興錢塘諸縣水災五月庚子韓國公李善長曹國公李文忠總中書省大都督府御史臺議軍國重事癸卯振湖廣水災丙午戶部主事趙乾振荆蘄遲緩伏誅六月丁巳詔臣民言事者實封達御前丙寅命政事啓皇太子裁決奏聞秋七月甲申置通政司是月始遣御

史巡按州縣八月庚戌改建大祀殿於南郊癸丑選武
臣子弟讀書國子監九月丙申振紹興金華衢州水災
辛丑胡惟庸爲左丞相汪廣洋爲右丞相冬十月戊午
封沐英西平侯辛酉賜百官公田十一月癸未衛國公
鄧愈卒丁亥合祀天地於奉天殿是月免河南陝西廣
東湖廣田租威茂蠻叛御史大夫丁玉爲平羌將軍討
平之十二月乙巳朔日有食之丁未錄故功臣子孫五
百餘人授官有差是年占城三佛齊暹羅瓜哇眞臘入
貢高麗使五至以嗣王未立却之

十一年春正月甲戌封皇子椿爲蜀王柏湘王桂豫王

漢王植衛王改封吳王橚爲周王己卯進封湯和信
國公是月徵天下布政使及知府來朝二月指揮胡淵
平茂州蠻三月壬午命奏事毋關白中書省是月第來
朝官爲三等夏四月元嗣君愛猷識理達臘殂子脫古
思帖木兒嗣五月丁酉存問蘇松嘉湖被水災民戶賜
米一石蠲逋賦六十五萬有奇六月壬子遣使祭故元
嗣君己巳五開蠻叛殺靖州指揮過興以辰州指揮楊
仲名爲總兵官討之秋七月丁丑振平陽饑是月蘇松
揚台海溢遣官存恤八月免應天太平鎮江寧國廣德
諸府州秋糧九月丙申追封劉繼祖爲義惠侯冬十月

甲子大祀殿成十一月庚午征西將軍西平侯沐英率都督藍玉王弼討西番是月五開蠻平是年暹羅闍婆高麗琉球占城三佛齊朶甘烏斯藏彭亨百花入貢十二年春正月己卯始合祀天地於南郊甲申洮州十八族番叛命沐英移兵討之丙申丁玉平松州蠻二月戊戌李文忠督理河岷臨鞏軍事乙巳詔曰今春雨雪經旬天下貧民困於饑寒者多有其令有司給以鈔丙寅信國公湯和率列侯練兵臨清夏五月癸未蠲北平田租六月丁卯都督馬雲征大寧秋七月丙辰丁玉回師討眉縣賊平之己未李文忠還掌大都督府事八月

辛巳詔凡致仕官復其家終身無所與九月己亥沐英大破西番禽其部長三副使十一月甲午沐英班師封仇成藍玉等十二人爲侯庚申大寧平十二月汪廣洋貶廣南賜死徵天下博學老成之士至京師是年占城瓜哇暹羅日本安南高麗入貢高麗貢黃金百斤白金萬兩以不如約却之

十三年春正月戊戌左丞相胡惟庸謀反及其黨御史大夫陳寧中丞涂節等伏誅癸卯大祀天地於南郊罷中書省廢丞相等官更定六部官秩改大都督府爲中左右前後五軍都督府二月壬戌朔詔舉聰明正直孝

第力田賢良方正文學術數之士發丹符驗天下金穀之數戊辰文武官年六十以上者聽致仕給以誥敕三月壬辰減蘇松嘉湖重賦十之二壬寅燕王棣之國北平壬子沐英襲元將脫火赤於亦集乃禽之盡降其衆夏四月己丑命羣臣各舉所知五月甲午雷震謹身殿乙未大赦丙申釋在京及臨濠屯田輸作者己亥免天下田租吏以過誤罷者還其職壬寅都督濮英進兵赤斤站獲故元幽王亦憐眞及其部曲而還是月罷御史臺命從征士卒老疾者許以子代老而無子及寡婦有司資遣還六月丙寅雷震奉天門避正殿省愆丁卯罷

王府工役丁丑置諫院官秋八月命天下學校師生日
給廩膳九月辛卯景川侯曹震榮陽侯楊璟永城侯薛
顯屯田北平乙巳天壽節始受羣臣朝賀賜宴於謹身
殿後以爲常丙午置四輔官告於太廟以儒士王本杜
佑龔敦杜敦趙民望吳源爲春夏官是月詔陝西衛軍
以三分之二屯田安置翰林學士承旨宋濂於茂州道
卒冬十一月乙未徐達還丙午元平章完者不花乃兒
不花犯永平指揮劉廣戰沒千戶王輅擊敗之禽完者
不花十二月天下府州縣所舉士至者八百六十餘人
授官有差南雄侯趙庸鎮廣東討陽春蠻是年琉球日

本安南占城眞臘瓜哇入貢日本以無表却之

十四年春正月戊子徐達爲征虜大將軍湯和傅友德爲左右副將軍帥師討乃兒不花命新授官者各舉所知乙未大祀天地於南郊壬子罷天下歲造兵器癸丑命公侯子弟入國學丙辰詔求隱逸二月庚辰覈天下官田三月丙戌大赦辛丑頒五經四書於北方學校夏四月庚午徐達率諸將出塞至北黃河擊破元兵獲全寧四部以歸五月五溪蠻叛江夏侯周德興討平之秋八月丙子詔求明經老成之士有司禮送京師庚辰河決原武祥符中牟辛巳徐達還九月壬午朔傅友德爲

征南將軍藍玉沐英爲左右副將軍帥師征雲南徐達
鎮北平丙午周德興移師討施州蠻平之冬十月壬子
朔日有食之癸丑命法司錄囚會翰林院給事中及春
坊官會議平允以聞甲寅免應天太平廣德鎮江寧國
田租癸亥分遣御史錄囚己卯延安侯唐勝宗帥師討
浙東山寇平之十一月壬午吉安侯陸仲亨鎮成都庚
戌趙庸討廣州海寇大破之十二月丁巳命翰林春坊
官考較諸司章奏戊辰傅友德大敗元兵於白石江遂
下曲靖壬申元梁王把匝剌瓦爾密走普寧自殺是年
暹羅安南瓜哇朶甘烏斯藏入貢以安南寇思明不納

明史卷二終

明史卷三

本紀第三

總裁官總理事務

經筵講官保兼太子太保和殿大學士兼管吏部戶部尚書事加六級張廷玉等奉

敷修

太祖三

十五年春正月辛巳宴羣臣於謹身殿始用九奏樂景川侯曹震定遠侯王弼下威楚路壬午元曲靖宣慰司及中慶澂江武定諸路俱降雲南平己丑減大辟囚乙未大祀天地於南郊庚戌命天下朝覲官各舉所知一人二月壬子河決河南命駙馬都尉李祺振之甲寅以雲南平詔天下閏月癸卯藍玉沐英克大理分兵徇鶴

慶麗江金齒俱下三月庚午河決朝邑夏四月甲申遷
元梁王把匝刺反兒密及威順王子伯伯等家屬於耽
羅丙戌詔天下通祀孔子壬辰免畿內浙江江西河南
山東稅糧五月乙丑太學成釋奠於先師孔子丙子廣
平府吏王允道請開磁州鐵冶帝曰朕聞王者使天下
無遺賢不聞無遺利今軍器不乏而民業已定無益於
國且重擾民杖之流嶺南丁丑遣行人訪經明行修之
士秋七月乙卯河決滎澤陽武辛酉罷四輔官乙亥傅
友德沐英擊烏撒蠻大敗之八月丁丑復設科取士三
年一行爲定制丙戌皇后崩己丑延安侯唐勝宗長興

侯耿炳文屯田陝西丁酉擢秀才曾泰爲戶部尚書辛丑命徵至秀才分六科試用九月己酉吏部以經明行修之士鄭韜等三千七百餘人入見令舉所知復遣使徵之賜韜等鈔尋各授布政使參政等官有差庚午葬孝慈皇后於孝陵冬十月丙子置都察院丙申錄囚甲辰徐達還是月廣東羣盜平詔趙庸班師十一月戊午置殿閣大學士以邵質吳伯宗宋訥吳沉爲之十二月辛卯振北平被災屯田士卒己亥永城侯薛顯理山西軍務是年瓜哇琉球烏斯藏占城入貢

十六年春正月乙卯大祀天地於南郊戊午徐達鎮北

平二月丙申初命天下學校歲貢士於京師三月甲辰
召征南師還沐英畱鎮雲南丙寅復鳳陽臨淮二縣民
繇賦世世無所與夏五月庚申免畿內各府田租六月
辛卯免畿內十二州縣養馬戶田租一年滁州免二年
秋七月分遣御史錄囚八月壬申朔日有食之九月癸
亥申國公鄧鎮爲征南將軍討龍泉山寇平之冬十月
丁丑召徐達等還十二月甲午刑部尚書開濟有罪誅
是年琉球占城西番打箭爐暹羅須文達那入貢
十七年春正月丁未大祀天地於南郊戊申徐達鎮北
平壬戌湯和巡視沿海諸城防倭三月戊戌朔頒科舉

取士式曹國公李文忠卒甲子大赦天下夏四月壬午
論平雲南功進封傅友德穎國公陳桓等侯者四人大
賚將士庚寅收陣亡遺骸增築國子學舍五月丙寅涼
州指揮宋晟討西番於亦集乃敗之秋七月戊戌禁內
官預外事敕諸司毋通內官監文移癸丑詔百官迎養
父母者官給舟車丁巳免畿內今年田租之半庚申錄
囚壬戌盱眙人獻天書斬之八月丙寅河決開封壬申
決杞縣遣官塞之己丑蠲河南諸省逋賦冬十月丙子
河南北平大水分遣駙馬都尉李祺等振之閏月癸丑
詔天下罪囚刑部都察院詳議大理寺覆讞後奏決是

月召徐達還十二月壬子蠲雲南逋賦是年琉球暹羅
安南占城入貢

十八年春正月辛未大祀天地於南郊癸酉朝覲官分
五等考績黜陟有差二月甲辰以久陰雨雷雹詔臣民
極言得失己未魏國公徐達卒三月壬戌賜丁顯等進
士及第出身有差詔中外官父母歿任所者有司給舟
車歸其喪著爲令乙亥免畿內今年田租命天下郡縣
瘞暴骨丙子初選進士爲翰林院承敕監六科庶吉士
己丑戶部侍郎郭桓坐盜官糧誅夏四月丁酉吏部尚
書余燠以罪誅丙辰思州蠻叛湯和爲征虜將軍周德

興爲副將軍帥師從楚王楨討之六月戊申定外官三年一朝著爲令秋七月甲辰封王禍爲高麗國王庚辰五開蠻叛八月庚戌馮勝傳友德藍玉備邊北平是月振河南水災冬十月己丑頒大誥於天下癸卯召馮勝還甲辰詔曰孟子傳道有功名教歷年旣久子孫甚微近有以罪輸作者豈禮先賢之意哉其加意詢訪凡聖賢後裔輸作者皆免之是月楚王楨信國公湯和討平五開蠻十一月乙亥蠲河南山東北平田租十二月丙午詔有司舉孝廉癸丑麓川平緬宣慰使思倫發反都督馮誠敗績千戶王昇死之是年高麗琉球安南暹羅

入貢

十九年春正月辛酉振大名及江浦水災甲子大祀天地於南郊是月征蠻師還二月丙申耕藉田癸丑振河南饑夏四月甲辰詔贖河南饑民所鬻子女六月甲辰詔有司存問高年貧民年八十以上月給米五斗酒三斗肉五斤九十以上歲加帛一匹絮一斤有田產者罷給米應天鳳陽富民年八十以上賜爵社士九十以上鄉士天下富民八十以上里士九十以上社士皆與縣官均禮復其家鰥寡孤獨不能自存者歲給米六石士卒戰傷除其籍賜復三年將校陣亡其子世襲加一秩

巖穴之士以禮聘遣丁未振青州及鄭州饑秋七月癸未詔舉經明行修練達時務之士年六十以上者置翰林備顧問六十以下於六部布按二司用之八月甲辰命皇太子修泗州盱眙祖陵葬德祖以下帝后冕服九月庚申屯田雲南冬十月命官軍已亡子女幼或父母老者皆給全俸著爲令十二月癸未朔日有食之是月命宋國公馮勝分兵防邊發北平山東山西河南民運糧於大寧是年高麗琉球暹羅占城安南入貢

二十年春正月癸丑馮勝爲征虜大將軍傅友德藍玉副之率師征納哈出焚錦衣衛刑具以繫囚付刑部甲

子大祀天地於南郊禮成天氣清明侍臣進曰此陛下敬天之誠所致帝曰所謂敬天者不獨嚴而有禮當有其實天以子民之任付於君爲君者欲求事天必先恤民恤民者事天之實也卽如國家命人任守令之事若不能福民則是棄君之命不敬孰大焉又曰爲人君者父天母地子民皆職分之所當盡祀天地非祈福於已實爲天下蒼生也二月壬午閱武乙未耕藉田三月辛亥馮勝率師出松亭關城大寧寬河會州富峪夏四月戊子江夏侯周德興築福建瀕海城練兵防倭六月庚子臨江侯陳鏞從征失道戰沒癸卯馮勝兵踰金山丁

未納哈出降閏月庚申師還次金山都督濮英殿軍遇
伏死之秋八月癸酉收馮勝將軍印召還藍玉攝軍事
景川侯曹震屯田雲南品甸九月戊寅封納哈出海西
侯癸未置大寧都指揮使司丁酉安置鄭國公常茂於
龍州丁未藍玉爲征虜大將軍延安侯唐勝宗武定侯
郭英副之北征沙漠是月城西寧冬十月戊申封朱壽
爲舳艫侯張赫爲航海侯是月馮勝罷歸鳳陽奉朝請
十一月壬午普定侯陳桓靖寧侯葉昇屯田定邊姚安
畢節諸衛己丑湯和還凡築寧海臨山等五十九城十
二月振登萊饑是年琉球安南高麗占城眞臘朶甘烏

明史卷三
本紀
斯藏入貢

二十一年春正月辛巳麓川蠻思倫發入寇馬龍他郎
甸都督寧正擊敗之辛卯大祀天地於南郊甲午振青
州饑逮治有司匿不以聞者三月乙亥賜任亨泰等進
士及第出身有差丙戌振東昌饑甲辰沐英討思倫發
敗之夏四月丙辰藍玉襲破元嗣君於捕魚兒海獲其
次子地保奴及妃主王公以下數萬人而還五月甲戌
朔日有食之六月甲辰信國公湯和歸鳳陽甲子傅友
德爲征南將軍沐英陳桓爲左右副將軍帥師討東川
叛蠻秋七月戊寅安置地保奴於琉球八月癸丑徙澤

潞民無業者墾河南北田賜鈔備農具復三年丁卯藍
玉師還大賚北征將士戊辰封孫恪爲全寧侯是月御
製八諭飭武臣九月丙戌秦晉燕周楚齊湘魯潭九王
來朝癸巳越州蠻阿資叛沐英會傅友德討之冬十月
丁未東川蠻平十二月壬戌進封藍玉涼國公是年高
麗占城琉球暹羅真臘撤馬兒罕安南入貢詔安南三
歲一朝象犀之屬毋獻安南黎季犛弑其主煒

二十二年春正月丙戌改太宗正院曰宗人府以秦王
瑛爲宗人令晉王櫟燕王棣爲左右宗正周王橚楚王
楨爲左右宗人丁亥大祀天地於南郊乙未傅友德破

阿資於普安二月己未藍玉練兵四川壬戌禁武臣預民事癸亥湖廣千戶夏得忠結九溪蠻作亂靖寧侯葉昇討平之得忠伏誅是月阿資降三月庚午傅友德帥諸將分屯四川湖廣防西南蠻夏四月己亥徙江南民田淮南賜鈔備農具復三年癸丑魏國公徐允恭開國公常昇等練兵湖廣甲寅徙元降王於耽羅是月遣御史按山東官匿災不奏者五月辛卯置泰寧朶顏福餘三衛於兀良哈秋七月傅友德等還八月乙卯詔天下舉高年有德識時務者是月更定大明律九月丙寅朔日有食之冬十一月丙寅宣德侯金鎮等練兵湖廣己

卯思倫發入貢謝罪麓川平十二月甲辰周王橚有罪
遷雲南尋罷徙畱居京師定遠侯王弼等練兵山西河
南陝西是年高麗安南占城暹羅真臘入貢元也速迭
兒弑其主脫古思帖木兒而立坤帖木兒高麗廢其主
禍又廢其主昌安南黎季犛復弑其主日焜

二十三年春正月丁卯晉王櫓燕王棣帥師征元丞相
咬住太尉乃兒不花征虜前將軍頴國公傅友德等皆
聽節制己卯大祀天地於南郊庚辰貴州蠻叛延安侯
唐勝宗討平之乙酉齊王搏帥師從燕王棣北征贛州
賊爲亂東川侯胡海充總兵官普定侯陳桓靖寧侯葉

昇爲副將討平之唐勝宗督貴州各衛屯田二月戊申
藍玉討平西番叛蠻丙辰耕藉田癸亥河決歸德發諸
軍民塞之三月癸巳燕王棣師次迤都咬住等降夏四
月吉安侯陸仲亨等坐胡惟庸黨下獄丙申潭王梓自
焚死閏月丙子藍玉平施南忠建叛蠻五月甲午遣諸
公侯還里賜金幣有差乙卯賜太師韓國公李善長死
陸仲亨等皆坐誅作昭示姦黨錄布告天下六月乙丑
藍玉遣鳳翔侯張龍平都勻散毛諸蠻庚寅授耆民有
才德知典故者官秋七月壬辰河決開封振之癸巳崇
明海門風雨海溢遣官振之發民二十五萬築隄八月

壬申詔毋以吏卒充選舉藍玉還是月振河南北平山東水災九月庚寅朔日有食之冬十月己卯振湖廣饑十一月癸丑免山東被災田租十二月癸亥令殊死以下囚輸粟北邊自贖壬申罷天下歲織文綺是年墨刺哈梅里高麗占城眞臘琉球暹羅入貢

二十四年春正月癸卯大祀天地於南郊戊申潁國公傅友德爲征虜將軍定遠侯王弼武定侯郭英副之備北平邊丁巳免山東田租二月壬申耕藉田三月戊子朔日有食之魏國公徐輝祖曹國公李景隆涼國公藍玉等備邊陝西乙未靖寧侯葉昇練兵甘肅丁酉賜許

觀等進士及第出身有差夏四月辛未封皇子櫟爲慶
王權寧王榼岷王穗谷王松韓王模藩王楹安王桢唐
王棟郢王機伊王癸未燕王棣督傅友德諸將出塞敗
敵而還五月戊戌漢衛谷慶寧岷六王練兵臨清六月
己未詔廷臣參考歷代禮制更定冠服居室器用制度
甲子久旱錄囚秋七月庚子徙富民實京師辛丑免畿
內官田租之半八月乙卯秦王榼有罪召還京師乙丑
皇太子巡撫陝西乙亥都督僉事劉眞宋晟討哈梅里
敗之九月乙酉遣使諭西域是月倭寇雷州百戶李玉
鎮撫陶鼎戰死冬十月丁巳免北平河間被水田租十

一月甲午五開蠻叛都督僉事茅鼎討平之庚戌皇太子還京師晉王櫟來朝辛亥振河南水災十二月庚午周王橚復國辛巳阿資復叛都督僉事何福討降之是年天下郡縣賦役黃冊成計戶千六十八萬四千四百三十五丁五千六百七十七萬四千五百六十一琉球暹羅別失八里撒馬兒罕入貢以占城有篡逆事却之二十五年春正月戊子周王橚來朝庚寅河決陽武發軍民塞之免被水田租乙未大祀天地於南郊何福討都勻畢節諸蠻平之辛丑令死囚輸粟塞下壬寅晉王櫟燕王棣楚王楨湘王柏來朝二月戊午召曹國公李

景隆等還京師靖寧侯葉昇等練兵於河南及臨鞏甘涼延慶都督茅鼎等平五開蠻丙寅耕藉田庚辰詔天下衛所軍以十之七屯田三月癸未馮勝等十四人分理陝西山西河南諸衛軍務庚寅改封豫王桂爲代王漢王模爲肅王衛王植爲遼王夏四月壬子涼國公藍玉征罕東癸丑建昌衛指揮月魯帖木兒叛指揮魯毅敗之丙子皇太子標薨戊寅都督聶緯徐司馬瞿能討月魯帖木兒侯藍玉還竝聽節制五月辛巳藍玉至罕東寇遁遂趨建昌己丑振陳州原武水災六月丁卯西平侯沐英卒於雲南秋七月庚辰秦王櫜復國癸未指

揮瞿能敗月魯帖木兒於雙狼寨八月己未江夏侯周德興坐事誅丁卯馮勝傅友德帥開國公常昇等分行山西籍民爲軍屯田於大同東勝立十六衛甲戌給公侯歲祿歸賜田於官丙子靖寧侯葉昇坐胡惟庸黨誅九月庚寅立皇孫允炆爲皇太孫高麗李成桂幽其主瑤而自立以國人表來請命詔聽之更其國號曰朝鮮冬十月乙亥沐春襲封西平侯鎮雲南十一月甲午藍玉禽月魯帖木兒誅之召玉還十二月甲戌宋國公馮勝潁國公傅友德等兼東宮師保官閏月戊戌馮勝爲總兵官傅友德副之練兵山西河南兼領屯衛是年疏

明史卷三
本紀三
球中山山南高麗哈梅里入貢

二十六年春正月戊申免天下耆民來朝辛酉大祀天地於南郊二月丁丑晉王櫚統山西河南軍出塞召馮勝傅友德常昇王弼等還乙酉蜀王椿來朝涼國公藍玉以謀反并鶴慶侯張翼普定侯陳桓景川侯曹震舳艫侯朱壽東莞伯何榮吏部尚書詹徽等皆坐誅己丑頒逆臣錄於天下庚寅耕藉田三月辛亥代王桂率護衛兵出塞聽晉王節制長興侯耿炳文練兵陝西丙辰馮勝傅友德備邊山西北平其屬衛將校悉聽晉王燕王節制庚申詔二王軍務大者始以聞壬戌會寧侯張

溫坐藍玉黨誅夏四月乙亥孝感饑遣使乘傳發倉貸之詔自今遇歲饑先貸後聞著爲令戊子周王橚來朝庚寅旱詔羣臣直言得失省獄囚丙申以安南擅廢立絕其朝貢秋七月甲辰朔日有食之戊申選秀才張宗濬等隨詹事府官分直文華殿侍皇太孫八月秦晉燕周齊五王來朝九月癸丑代肅遼慶寧五王來朝赦胡惟庸藍玉餘黨冬十月丙申擢國子監生六十四人爲布政使等官十二月頒永鑑錄於諸王是年琉球爪哇暹羅入貢

二十七年春正月乙卯大祀天地於南郊辛酉李景隆

爲平羌將軍鎮甘肅發天下倉穀貸貧民三月庚子賜
張信等進士及第出身有差辛丑魏國公徐輝祖安陸
侯吳傑備倭浙江庚戌課民樹桑棗木棉甲子以四方
底平收藏甲兵示不復用秋八月甲戌吳傑及永定侯
張銓率致仕武臣備倭廣東乙亥遣國子監生分行天
下督吏民修水利丙戌階文軍亂都督寧正爲平羌將
軍討之九月徐輝祖節制陝西沿邊諸軍冬十一月乙
丑潁國公傅友德坐事誅阿資復叛西平侯沐春擊敗
之十二月乙亥定遠侯王弼坐事誅是年烏斯藏琉球
緬朶甘瓜哇撒馬兒罕朝鮮入貢安南來貢却之

二十八年春正月丙午階文寇平寧正以兵從秦王檣
征洮州叛番丁未大祀天地於南郊甲子西平侯沐春
擒斬阿資越州平是月周王橐晉王櫟率河南山西諸
衛軍出塞築城屯田燕王棣帥總兵官周興出遼東塞
二月丁卯宋國公馮勝坐事誅己丑諭戶部編民百戶
爲里婚姻死喪疾病患難里中富者助財貧者助力春
秋耕穫通力合作以教民睦六月壬申詔諸土司皆立
儒學辛巳周興等自開原追敵至甫答迷城不及而還
己丑御奉天門諭羣臣曰朕起兵至今四十餘年灼見
情僞懲創奸頑或法外用刑本非常典後嗣止循律與

大誥不許用黥刺剕閹割之刑臣下敢以請者寘重典又曰朕罷丞相設府部都察院分理庶政事權歸於朝廷嗣君不許復立丞相臣下敢以請者寘重典皇親惟謀逆不赦餘罪宗親會議取上裁法司祇許舉奏毋得擅逮勒諸典章永爲遵守秋八月丁卯都督楊文爲征南將軍指揮韓觀都督僉事宋晟副之討龍州土官趙宗壽戊辰信國公湯和卒辛巳趙宗壽伏罪來朝楊文移兵討奉議南丹叛蠻九月丁酉免畿內山東秋糧庚戌頒皇明祖訓條章於中外後世有言更祖制者以奸臣論十一月乙亥奉議南丹蠻悉平十二月壬辰詔

河南山東桑棗及二十七年後新墾田毋徵稅是年朝鮮琉球暹羅入貢

二十九年春正月壬申大祀天地於南郊二月癸卯征虜前將軍胡冕討郴桂蠻平之辛亥燕王棣帥師巡大寧周世子有燉帥師巡北平關隘三月辛酉楚王楨湘王柏來朝甲子燕王敗敵於徹徹兒山又追敗之於兀良哈禿城而還秋八月丁未免應天太平五府田租九月乙亥召致仕武臣二千五百餘人入朝大賚之各進秩一級是年琉球安南朝鮮烏斯藏入貢

三十年春正月甲戌耿炳文爲征西將軍郭英副之巡

西北邊丙寅大祀天地於南郊丁卯置行太僕寺於山
西北平陝西甘肅遼東掌馬政己巳左都督楊文屯田
遼東是月沔縣盜起詔耿炳文討之二月庚寅水西蠻
叛都督僉事顧成爲征南將軍討平之三月癸丑賜陳
郊等進士及第出身有差庚辰古州蠻叛龍里千戶吳
得鎮撫井孚戰死夏四月己亥都指揮齊讓爲平羌將
軍討之壬寅水西蠻平五月壬子朔日有食之乙卯楚
王楨湘王柏帥師討古州蠻六月辛巳賜禮部覆試貢
士韓克忠等進士及第出身有差己酉駙馬都尉歐陽
倫有罪賜死秋八月丁亥河決開封甲午李景隆爲征

虜大將軍練兵河南九月庚戌漢沔寇平戊辰麓川平
緬土酋刀幹孟逐其宣慰使思倫發以叛乙亥都督楊
文爲征虜將軍代齊讓冬十月戊子停遼東海運辛卯
耿炳文練兵陝西乙未重建國子監先師廟成十一月
癸酉沐春爲征虜前將軍都督何福等副之討刀幹孟
是年琉球占城朝鮮暹羅烏斯藏泥八刺入貢

三十一年春正月壬戌大祀天地於南郊乙丑遣使之
山東河南課耕二月乙酉倭寇寧海指揮陶鐸擊敗之
辛丑古州蠻平召楊文還甲辰都督僉事徐凱討平麼
些蠻夏四月庚辰廷臣以朝鮮屢生釁隙請討不許五

月丁未沐春擊刀幹孟大敗之甲寅帝不豫戊午都督楊文從燕王棣武定侯郭英從遼王植備禦開平俱聽燕王節制閏月癸未帝疾大漸乙酉崩於西宮年七十有一遺詔曰朕膺天命三十有一年憂危積心日勤不怠務有益於民奈起自寒微無古人之博知好善惡惡不及遠矣今得萬物自然之理其奚哀念之有皇太孫允炆仁明孝友天下歸心宜登大位內外文武臣僚同心輔政以安吾民喪祭儀物毋用金玉孝陵山川因其故毋改作天下臣民哭臨三日皆釋服毋妨嫁娶諸王臨國中毋至京師諸不在令中者推此令從事辛卯葬

孝陵謚曰高皇帝廟號太祖永樂元年謚神聖文武欽
明啓運俊德成功統天大孝高皇帝嘉靖十七年增謚
開天行道肇紀立極大聖至神仁文義武俊德成功高
皇帝帝天授智勇統一方夏緯武經文爲漢唐宋諸君
所未及當其肇造之初能沉幾觀變次第經畧綽有成
算嘗與諸臣論取天下之畧曰朕遭時喪亂初起鄉土
本圖自全及渡江以來觀羣雄所爲徒爲生民之患而
張士誠陳友諒尤爲巨蠹士誠恃富友諒恃強朕獨無
所恃惟不嗜殺人布信義行節儉與卿等同心共濟初
與二寇相持士誠尤逼近或謂宜先擊之朕以友諒志

驕士誠器小志驕則好生事器小則無遠圖故先攻友
諒鄱陽之役士誠卒不能出姑蘇一步以爲之援向使
先攻士誠浙西負固堅守友諒必空國而來吾腹背受
敵矣二寇旣除北定中原所以先山東次河洛止潼關
之兵不遽取秦隴者蓋擴廓帖木兒李思齊張思道皆
百戰之餘未肯遽下急之則併力一隅猝未易定故出
其不意反旆而北燕都旣舉然後西征張李望絕勢窮
不戰而克然擴廓猶力抗不屈向令未下燕都驟與角
力勝負未可知也帝之雄才大畧料敵制勝率類此故
能戡定禍亂以有天下語云天道後起者勝豈偶然哉

贊曰太祖以聰明神武之資抱濟世安民之志乘時應
運豪傑景從戡亂摧強十五載而成帝業崛起布衣奄
奠海宇西漢以後所未有也愍元政廢弛治尚嚴峻而
能禮致耆儒考禮定樂昭揭經義尊崇正學加恩勝國
澄清吏治修人紀崇風教正後宮名義內治肅清禁宦
豎不得干政五府六部官職相維置衛屯田兵食俱足
武定禍亂文致太平太祖實身兼之至於雅尚志節聽
蔡子英北歸晚歲憂民益切嘗以一歲開支河暨塘堰
數萬以利農桑備旱潦用此子孫承業二百餘年士重
名義閭閻充實至今苗裔蒙澤尚如東樓白馬世承先

祀有以哉

明史卷三終

明史卷四

本紀第四

總裁官總理事務

經筵講官少保兼太子太保保和殿大學士兼管吏部戶部尚書事加六級張廷玉等奉

敕修

恭閔帝

恭閔惠皇帝諱允炆太祖孫懿文太子第二子也母妃呂氏帝生穎慧好學性至孝年十四侍懿文太子疾晝夜不暫離更二年太子薨居喪毀瘠太祖撫之曰而誠純孝顧不念我乎洪武二十五年九月立爲皇太孫二十九年重定諸王見東宮儀制朝見後於內殿行家人禮以諸王皆尊屬也初太祖命太子省決章奏太子性

仁厚於刑獄多所減省至是以命太孫太孫亦復佐以寬大嘗請於太祖遍考禮經叅之歷朝刑法改定洪武律畸重者七十三條天下莫不頌德焉三十一年閏五月太祖崩辛卯卽皇帝位大赦天下以明年爲建文元年是日葬高皇帝於孝陵詔行三年喪羣臣請以日易月帝曰朕非效古人亮陰不言也朝則麻冕裳退則齊衰杖經食則饘粥郊社宗廟如常禮遂命定儀以進丙申詔文臣五品以上及州縣官各舉所知非其人者坐之六月省并州縣革冗員兵部侍郎齊泰爲本部尚書翰林院修撰黃子澄爲太常卿同叅軍國事秋七月召

漢中府教授方孝孺爲翰林院侍講詔行寬政赦有罪
蠲逋賦八月周王橚有罪廢爲庶人徙雲南詔興州營
州開平諸衛軍全家在伍者免一人天下衛所軍單丁
者放爲民九月雲南總兵官西平侯沐春卒於軍左副
將何福代領其衆冬十一月工部侍郎張昺爲北平布
政使謝貴張信掌北平都指揮使司察燕陰事詔求直
言舉山林才德之士十二月癸卯何福破斬刀幹孟麓
川平是月賜天下明年田租之半釋黥軍及囚徒還鄉
里是年暹羅占城入貢

建文元年春正月癸酉受朝不舉樂庚辰大祀天地於

南郊奉太祖配修太祖實錄二月追尊皇考曰孝康皇帝廟號興宗妣常氏曰孝康皇后尊母妃呂氏曰皇太后冊妃馬氏爲皇后封弟允熲爲吳王允熹衡王允熙徐王立皇長子文奎爲皇太子詔告天下舉遺賢賜民高年米肉絮帛鰥寡孤獨廢疾者官爲牧養重農桑興學校考察官吏振罹災貧民旌節孝痊暴骨蠲荒田租衛所軍戶絕者除勿勾詔諸王母得節制文武吏士更定內外大小官制三月釋奠於先師孔子罷天下諸司不急務都督宋忠徐凱耿璈帥兵屯開平臨清山海關調北平永清二衛軍於彰德順德侍郎暴昭夏原吉等

二十四人充採訪使分巡天下甲午京師地震求直言
夏四月湘王柏自焚死齊王搏代王桂有罪廢爲庶人
遣燕王世子高熾及其弟高煦高燧還北平六月岷王
梗有罪廢爲庶人徙漳州己酉燕山護衛百戶倪諒上
變燕旗校於諒等伏誅詔讓燕王棣逮王府官僚北平
都指揮張信叛附於燕秋七月癸酉燕王棣舉兵反殺
布政使張昺都司謝貴長史葛誠指揮盧振教授余逢
辰死之叅政郭資副使墨麟僉事呂震等降於燕指揮
馬宣走薊州俞瑱走居庸宋忠趨北平聞變退保懷來
通州遵化密雲相繼降燕丙子燕兵陷薊州馬宣戰死

己卯燕兵陷居庸關甲申陷懷來宋忠俞瑱被執死都指揮彭聚孫泰力戰死永平指揮郭亮等叛降燕壬辰谷王穗自宣府奔京師長興侯耿炳文爲征虜大將軍駙馬都尉李堅都督甯忠爲左右副將軍帥師討燕祭告天地宗廟社稷削燕屬籍詔曰邦家不造骨肉周親屢謀僭逆去年周庶人橚僭爲不軌辭連燕齊湘三王朕以親親故止正橚罪今年齊王橚謀逆又與棣柏同謀柏伏罪自焚死橚已廢爲庶人朕以棣於親最近未忍窮治其事今乃稱兵構亂圖危宗社獲罪天地祖宗義不容赦是用簡發大兵往致厥罰咨爾中外臣民軍

士各懷忠守義與國同心掃茲逆氛永安至治尋命安
陸侯吳傑江陰侯吳高都督耿璫都指揮盛庸潘忠楊
松顧成徐凱李友陳暉平安分道竝進置平燕布政使
司於真定尚書暴昭掌司事八月己酉耿炳文兵次真
定徐凱屯河間潘忠楊松屯鄭州壬子燕兵陷雄縣潘
忠楊松戰於月漾橋被執鄭州陷壬戌耿炳文及燕兵
戰於滹沱河北敗績李堅甯忠顧成被執炳文退保真
定燕兵攻之不克引去召遼王植寧王權歸京師權不
至詔削護衛丁卯曹國公李景隆爲征虜大將軍代耿
炳文九月壬辰吳高耿璫楊文帥遼東兵圍永平戊寅

景隆兵次河間燕兵援永平吳高退保山海關冬十月燕兵自劉家口間道襲陷大寧守將朱鑑死之總兵官劉真都督陳亨援大寧亨叛降燕燕以寧王權及朶顏三衛卒歸北平辛亥李景隆圍北平燕兵還救十一月辛未李景隆及燕兵戰於鄭村壩敗績奔德州諸軍盡潰燕王棣再上書於朝帝爲罷齊泰黃子澄官仍畱京師

二年春正月丙寅朔詔天下來朝官勿賀丁卯釋奠於先師孔子二月燕兵陷蔚州進攻大同李景隆自德州赴援燕兵還北平保定知府雒僉叛降燕甲子復以都

察院爲御史府均江浙田賦詔曰國家有惟正之供江浙賦獨重而蘇松官田悉準私稅用懲一時豈可爲定則今悉與減免畝母踰一斗蘇松人仍得官戶部三月丙寅朔日有食之賜胡廣等進士及第出身有差夏四月己未李景隆及燕兵戰於白溝河敗之明日復戰敗績都督瞿能越嶲侯俞淵指揮滕聚等皆戰死景隆奔德州五月辛未奔濟南燕兵陷德州遂攻濟南庚辰景隆敗績於城下南走叅政鐵鉉都督盛庸悉力禦之六月己酉遣尚寶丞李得成諭燕罷兵秋八月癸巳承天門災詔求直言戊申盛庸鐵鉉擊敗燕兵濟南圍解復

德州九月詔錄洪武中功臣罪廢者後辛未封盛庸歷城侯擢鐵鉉山東布政使叅贊軍務尋進兵部尚書以庸爲平燕將軍都督陳暉平安副之庸屯德州平安及吳傑屯定州徐凱屯滄州冬十月召李景隆還赦不誅庚申燕兵襲滄州徐凱被執十二月甲午燕兵犯濟寧薄東昌乙卯盛庸擊敗之斬其將張玉丙辰復戰又敗之燕兵走館陶庸軍勢大振檄諸屯軍合擊燕絕其歸路

三年春正月辛酉朔凝命神寶成告天地宗廟御奉天殿受朝賀乙丑吳傑平安邀擊燕兵於深州不利辛未

大祀天地於南郊丁丑享太廟告東昌捷復齊泰黃子澄官三月辛巳盛庸敗燕兵於夾河斬其將譚淵再戰不利都指揮莊得楚智等力戰死壬午復戰敗績庸走德州丁亥都督何福援德州癸巳貶齊泰黃子澄諭燕罷兵閏月己亥吳傑平安及燕戰於藁城敗績還保真定燕兵掠真定順德廣平大名棣上書請召還諸將息兵遣大理少卿薛嵒報之是月禮制成頒行天下五月甲寅盛庸以兵扼燕餉道不克棣復遣使上書下其使於獄六月壬申燕將李遠寇沛縣焚糧艘壬午都督袁宇邀擊之敗績秋七月己丑燕兵掠彰德丁酉平安自

眞定攻北平壬寅大同守將房昭帥兵由紫荆關趨保定駐易州西水寨九月甲辰平安及燕將劉江戰於北平敗績還保眞定冬十月丁巳眞定諸將遣兵援房昭及燕王戰於齊眉山敗績十一月壬辰遼東總兵官楊文攻永平及劉江戰於昌黎敗績己亥平安敗燕將李彬於楊村十二月癸亥燕兵焚眞定軍儲詔中官奉使侵暴吏民者所在有司繫治是月駙馬都尉梅殷鎮淮安太祖實錄成

四年春正月甲申召故周王橚於蒙化居之京師燕兵連陷東阿東平汶上兗州濟陽東平吏目鄭華濟陽教

諭王省皆死之甲申魏國公徐輝祖帥師援山東燕兵陷沛縣知縣顏伯瑋主簿唐子清典史黃謙死之癸丑薄徐州二月甲寅都督何福及陳暉平安軍濟寧盛庸軍淮上己卯更定品官勲階三月燕兵攻宿州平安追及於肥河斬其將王眞遇伏敗績宿州陷夏四月丁卯何福平安敗燕兵於小河斬其將陳文甲戊徐輝祖等敗燕兵於齊眉山斬其將李斌燕兵懼謀北歸會帝聞訛言謂燕兵已北召輝祖還何福軍亦孤庚辰諸將及燕兵大戰於靈璧敗績陳暉平安禮部侍郎陳性善大理寺卿彭與明皆被執五月癸未楊文帥遼東兵赴濟

南潰於直沽己丑盛庸軍潰於淮上燕兵渡淮趨揚州
指揮王禮等叛降燕御史王彬指揮崇剛死之辛丑燕
兵至六合諸軍迎戰敗績壬寅詔天下勤王遣御史大
夫練子寧侍郎黃觀修撰王叔英分道徵兵召齊泰黃
子澄還蘇州知府姚善寧波知府王璉徽州知府陳彥
回樂平知縣張彥方各起兵入衛甲辰遣慶成郡主如
燕師議割地罷兵六月癸丑盛庸帥舟師敗燕兵於浦
子口復戰不利都督僉事陳瑄以舟師叛附於燕乙卯
燕兵渡江盛庸戰於高資港敗績戊午鎮江守將童俊
叛降燕庚申燕兵至龍潭辛酉命諸王分守都城遣李

景隆及兵部尚書茹瑯都督王佐如燕軍申前約壬戌復遣谷王穗安王楹往皆不聽甲子遣使齎蠟書四出促勤王兵乙丑燕兵犯金川門左都督徐增壽謀內應伏誅谷王穗及李景隆叛納燕兵都城陷宮中火起帝不知所終燕王遣中使出帝后屍於火中越八日壬申葬之或云帝由地道出亡正統五年有僧自雲南至廣西詭稱建文皇帝思恩知府岑瑛聞於朝按問乃釣州人楊行祥年已九十餘下獄閱四月死同謀僧十二人皆戍遼東自後滇黔巴蜀間相傳有帝爲僧時往來跡正德萬曆崇禎間諸臣請續封帝後及加廟諡皆下部

明史卷四
本紀
議不果行

大清乾隆元年

詔廷臣集議追諡曰恭閔惠皇帝

贊曰惠帝天資仁厚踐阼之初親賢好學召用方孝孺等典章制度銳意復古嘗因病晏朝尹昌隆進諫卽深自引咎宣其疏於中外又除軍衛單丁減蘇松重賦皆惠民之大者乃革命而後紀年復稱洪武嗣是子孫臣庶以紀載爲嫌草野傳疑不無訛謬更越

聖朝得經論定尊名壹惠君德用彰懿哉

明史卷四終

明史卷五

本紀第五

總裁官總理事務

經筵講官保兼太子太保保和殿大學士兼管吏部戶部尚書事加六級張廷玉等奉

敕修

成祖一

成祖啓天弘道高明肇運聖武神功純仁至孝文皇帝

諱棣太祖第四子也母孝慈高皇后洪武三年封燕王
十三年之藩北平王貌奇偉美髭髯智勇有大畧能推
誠任人二十三年同晉王討乃兒不花晉王怯不敢進
王倍道趨迤都山獲其全部而還太祖大喜是後屢帥
諸將出征並令王節制沿邊士馬王威名大振三十一

年閏五月太祖崩皇太孫卽位遺詔諸王臨國中毋得至京師王自北平入奔喪聞詔乃止時諸王以尊屬擁重兵多不法帝納齊泰黃子澄謀欲因事以次削除之憚燕王強未發乃先廢周王橚欲以牽引燕於是告訐四起湘代齊岷皆以罪廢王內自危佯狂稱疾泰子澄密勸帝除王帝未決建文元年夏六月燕山百戶倪諒告變逮官校於諒周鐸等伏誅下詔讓王并遣中官逮王府僚王遂稱疾篤都指揮使謝貴布政使張昺以兵守王宮王密與僧道衍謀令指揮張玉朱能潛納勇士八百人入府守衛秋七月癸酉匿壯士端禮門給貴昺

入殺之遂奪九門上書天子指泰子澄爲奸臣并援祖訓朝無正臣內有奸惡則親王訓兵待命天子密詔諸王統領鎮兵討平之書旣發遂舉兵自署官屬稱其師曰靖難拔居庸關破懷來執宋忠取密雲克遵化降永平二旬衆至數萬八月天子以耿炳文爲大將軍帥師致討已酉師至真定前鋒抵雄縣壬子王夜渡白溝河圍雄拔其城屠之甲寅都指揮潘忠楊松自鄭州來援伏兵擒之遂據鄭州還駐白溝大將軍部校張保來降言大將軍軍三十萬先至者十三萬半營滹沱河南半營河北王懼與北軍戰南軍且乘之也乃縱保歸俾揚

言王帥兵且至誘其軍盡北渡河壬戌王至真定與張玉譚淵等夾擊炳文軍大破之獲其副將李堅甯忠及都督顧成等斬首三萬級進圍真定二日不下乃引去天子聞炳文敗遣曹國公李景隆代領其軍九月戊辰江陰侯吳高以遼東兵圍永平戊寅景隆合兵五十萬進營河間王語諸將曰景隆色厲而中餒聞我在必不敢遽來不若往援永平以致其師吳高怯不任戰我至必走然後還擊景隆堅城在前大軍在後必成擒矣丙戌燕師援永平壬辰吳高聞王至果走追擊敗之遂北趨大寧壬寅以計入其城居七日挾寧王權拔大寧之

衆及朶顏三衛卒俱南乙卯至會州始立五軍張王將中軍鄭亨何壽副之朱能將左軍朱榮李濬副之李彬將右軍徐理孟善副之徐忠將前軍陳文吳達副之房寬將後軍和允中毛整副之丁巳入松亭關景隆聞王征大寧果引軍圍北平築壘九門世子堅守不戰十一月庚午王次孤山邏騎還報曰白河流澌不可渡王禱於神至則冰合乃濟師景隆遣都督陳暉偵敵道左出王軍後王分軍還擊之暉衆爭渡河冰忽解溺死無算辛未與景隆戰於鄭村壩王以精騎先破其七營諸將繼至景隆大敗奔還乙亥復上書自訴十二月景隆調

兵德州期以明年春大舉王乃謀侵大同曰攻大同彼必赴救大同苦寒南軍脆弱且不戰疲矣庚申降廣昌二年春正月丙寅克蔚州二月癸丑至大同景隆果由紫荆關來援王已旋軍居庸景隆兵多凍餒死者不見敵而還夏四月景隆進兵河間與郭英吳傑平安期會白溝河乙卯王營蘇家橋已未遇平安兵河側王以百騎前佯却誘安陣動乘之安敗走遂薄景隆軍戰不利暝收軍王以三騎殿夜迷失道下馬伏地視河流乃辨東西渡河去庚申復戰景隆橫陣數十里破燕後軍王自帥精騎橫擊之斬瞿能父子令邱福衝中堅不得入

王盪其左景隆兵乃繞出王後大戰良久飛矢雨注王
三易馬矢盡揮劍劍折走登堤佯引鞭若招後繼者景
隆疑有伏不敢前高煦救至乃解時南軍益集燕將士
皆失色王奮然曰吾不進敵不退有戰耳乃復以勁卒
突出其背夾攻之會旋風起折景隆旂王乘風縱火奮
擊斬首數萬溺死者十餘萬人郭英潰而西景隆潰而
南盡喪其所賜璽書斧鉞走德州五月癸酉王入德州
景隆走濟南庚辰攻濟南敗景隆軍城下鐵鉉盛庸堅
守不克秋八月戊申解圍還北平九月盛庸代李景隆
將復取德州與吳傑平安徐凱相犄角以困北平時徐

凱方城滄州王佯出兵攻遼東至通州循河而南渡直沽晝夜兼行冬十月戊午襲執徐凱破其城夜坑降卒三千人遂渡河過德州盛庸遣兵來襲擊敗之十一月壬申至臨清十二月丁酉襲破盛庸將孫霖於滑口乙卯及庸戰於東昌庸以火器勁弩殲王兵會平安軍至合圍數重王大敗潰圍以免亡數萬人張玉戰死三年春正月辛酉敗吳傑平安於威縣又敗之於深州遂還北平二月乙巳復帥師南下三月辛巳與盛庸遇於夾河譚淵戰死朱能張武殊死鬪庸軍少却會日暮各斂兵入營王以十餘騎逼庸營野宿及明起視已在圍中

乃從容引馬鳴角穿營而去諸將以天子有詔毋使負
殺叔父名倉卒相顧愕眙不敢發一矢是日復戰自辰
至未兩軍相勝負東北風忽起塵埃蔽天燕兵大呼乘
風縱擊庸大敗走德州吳傑平安自真定引軍與庸會
未至八十里聞敗引還王以計誘之傑安出兵襲王閏
月戊戌遇於藁城己亥與戰大風拔木傑安敗走追至
真定城下癸丑至大名聞齊泰黃子澄已罷上書請召
還吳傑平安盛庸兵天子使大理少卿薛嵩來報諭王
釋甲王不奉詔夏五月傑安庸分兵斷燕餉道王遣指
揮武勝上書詰其故天子怒下勝獄王遂遣李遠畧沛

縣焚糧舟萬計秋七月己丑掠彰德丙申降林縣平安
乘虛搗北平王遣劉江迎戰安敗走房昭屯易州西水
寨攻保定王引兵圍之冬十月丁巳都指揮花英援昭
敗之峨眉山下斬首萬級昭棄寨走巳卯還北平十一
月乙巳王自爲文祭南北陣亡將士當是時王稱兵三
年矣親戰陣冒矢石以身先士卒常乘勝逐北然亦屢
瀕於危所克城邑兵去旋復爲朝廷守僅據有北平保
定永平三府而已無何中官被黜者來奔具言京師空
虛可取狀王乃慨然曰頻年用兵何時已乎要當臨江
一決不復返顧矣十二月丙寅復出師四年春正月乙

未由館陶渡河癸丑徇徐州三月壬辰平安以四萬騎躡王軍王設伏淝河大敗之丙午遣譚清斷徐州餉道還至大店爲鐵鉉軍所圍王引兵馳援清突圍出合擊敗之夏四月丙寅王營小河爲橋以濟平安趨爭橋陳文戰死平安軍橋南王軍橋北相持數日平安轉戰遇王於北坂王幾爲安槊所及番騎王騏躍入陣掖王逸去王曰南軍饑更一二日餉至猝未易破乃令千餘人守橋夜半渡河而南繞出安軍後比旦安始覺適徐輝祖來會甲戌大戰齊眉山下時燕連失大將淮土盛暑蒸濕諸將請休軍小河東就麥觀釁王曰今敵持久饑

疲遮其餉道可以坐困奈何北渡懈將士心乃下令欲渡河者左諸將爭趨左王怒曰任公等所之乃無敢復言丁丑何福等營靈璧燕遮其餉道平安分兵六萬人護之己卯王帥精銳橫擊斷其軍爲二何福空壁來援王軍少却高煦伏兵起福敗走辛巳進薄其壘破之生擒平安陳暉等三十七人何福走免五月己丑下泗州謁祖陵賜父老牛酒辛卯盛庸扼淮南岸朱能邱福潛濟襲走之遂克盱眙癸巳王集諸將議所向或言宜取鳳陽或言先取淮安王曰鳳陽樓櫓完淮安多積粟攻之未易下不若乘勝直趨揚州指儀真則淮鳳自震我

耀兵江上京師孤危必有內變諸將皆曰善巳亥徇揚州駐軍江北天子遣慶成郡主至軍中許割地以和不聽六月癸丑江防都督僉事陳瑄以舟師叛附於王甲寅祭大江乙卯自瓜州渡盛庸以海艘迎戰敗績戊午下鎮江庚申次龍潭辛酉天子復遣大臣議割地諸王繼至皆不聽乙丑至金川門谷王穗李景隆等開門納王都城遂陷是日王分命諸將守城及皇城還駐龍江下令撫安軍民大索齊泰黃子澄方孝孺等五十餘人榜其姓名曰奸臣丙寅諸王羣臣上表勸進巳巳王謁孝陵羣臣備法駕奉寶璽迎呼萬歲王升輦詣奉天殿

卽皇帝位復周王橚齊王榑爵壬申葬建文皇帝丁丑
殺齊泰黃子澄方孝孺並夷其族坐奸黨死者甚衆戊
寅遷興宗孝康皇帝主於陵園仍稱懿文太子秋七月
壬午朔大祀天地於南郊奉太祖配詔今年以洪武三
十五年爲紀明年爲永樂元年建文中更改成法一復
舊制山東北平河南被兵州縣復徭役三年未被兵者
與鳳陽淮安徐滁揚三州蠲租一年餘天下州縣悉蠲
今年田租之半癸未召前北平按察使陳瑛爲左副都
御史盡復建文朝廢斥者官甲申復官制癸巳改封吳
王允熲廣澤王衡王允熒懷恩王徐王允熙敷惠王隨

母妃呂氏居懿文太子陵園癸卯江陰侯吳高督河南
陝西兵備撫安軍民甲辰尚書嚴震直王鈍府尹薛正
言等巡視山西山東河南陝西八月壬子侍讀解縉編
修黃淮入直文淵閣尋命侍讀胡廣修撰楊榮編修楊
士奇檢討金幼孜胡儼同入直並預機務執兵部尚書
鐵鉉至不屈殺之左軍都督劉真鎮遼東丁巳分遣御
史察天下利弊戊午都督何福爲征虜將軍鎮寧夏節
制陝西行都司都督同知韓觀練兵江西節制廣東福
建甲子西平侯沐晟鎮雲南九月甲申論靖難功封邱
福淇國公朱能成國公張武等侯者十三人徐祥等伯

者十一人論欵附功封駙馬都尉王寧爲侯茹瑄陳瑄
及都督同知王佐皆爲伯甲午定功臣死罪減祿例乙
未徙山西民無田者實北平賜之鈔復五年韓觀爲征
南將軍鎮廣西冬十月壬申徙封谷王穗於長沙丁巳
命北平州縣棄官避靖難兵者朱寧等二百一十九人
入粟免死戊興州己未脩太祖實錄丙寅鎮遠侯顧成
鎮貴州甲戌詔從征將士掠民間子女者還其家十一
月壬辰立妃徐氏爲皇后廢廣澤王允熲懷恩王允熈
爲庶人十二月癸丑蠲被兵州縣明年夏稅

明史卷五終

明史卷六

本紀第六

總裁官總理事務 經筵講官保兼太子太保保和殿大學士兼管軍器部尚書事加六級張廷玉等奉

敕修

成祖二

永樂元年春正月己卯朔御奉天殿受朝賀宴羣臣及屬國使乙酉享太廟辛卯大祀天地於南郊復周王橚齊王樽代王桂岷王榼舊封以北平爲北京癸巳保定侯孟善鎮遼東丁酉宋晟爲平羌將軍鎮甘肅二月庚戌設北京留守行後軍都督府行部國子監改北平曰順天府乙卯遣御史分巡天下爲定制己未徙封寧王

權於南昌貽書鬼力赤可汗許其遣使通好癸亥耕藉
田乙丑遣使徵尚師哈立麻於烏斯藏己巳振北京六
府饑辛未命法司五日一引奏罪囚壬申瘞戰地暴骨
甲戌高陽王高煦備邊開平三月庚辰江陰侯吳高鎮
大同壬午改北平行都司爲大寧都司徙保定始以大
寧地畀兀良哈戊子平江伯陳瑄都督僉事宣信充總
兵官督海運餉遼東北京歲以爲常甲午振直隸北京
山東河南饑夏四月丁未朔安南胡奎乞襲陳氏封爵
遣使察實以聞己酉戶部尚書夏原吉治蘇松嘉湖水
患辛未岷王榷有罪降其官屬甲戌襄城伯李濬鎮江

西五月丁丑除天下荒田未墾者額稅癸未宥死罪以下遞減一等庚寅捕山東蝗丁酉河南蝗免今年夏稅是月再論靖難功封駙馬都尉袁容等三人爲侯陳亨子懋等六人爲伯六月壬子代王桂有罪削其護衛癸丑遣給事中御史分行天下撫安軍民有司奸貪者逮治丁巳改上高皇帝高皇后尊諡戊辰武安侯鄭亨鎮宣府秋七月庚寅復貽書鬼力赤八月己巳發流罪以下墾北京田甲戌徙直隸蘇州等十郡浙江等九省富民實北京九月癸未命寶源局鑄農器給山東被兵窮民庚寅初遣中官馬彬使爪哇諸國乙未奪歷城侯盛

明史卷六 本紀二
庸爵尋自殺庚子岷王梗有罪削其護衛冬十一月乙亥朔頒曆於朝鮮諸國著爲令壬辰罷遣浚河民夫甲午北京地震乙未命六科辦事官言事丙申韓觀討柳州山賊平之閏月丁卯封胡奎爲安南國王是年始命內臣出鎮及監京營軍朝鮮入貢者六自是歲時貢賀爲常琉球中山山北山南暹羅占城爪哇西王日本刺泥安南入貢

二年春正月乙卯大祀天地於南郊己巳召世子高熾及高陽王高煦還京師三月乙巳賜曾棨等進士及第出身有差己酉始選進士爲翰林院庶吉士庚戌吏部

請罪千戶違制薦士者帝曰馬周不因常何進乎果才授之官否則罷之可耳戊辰改封敷惠王允熙甌寧王奉懿文太子祀夏四月辛未朔置東宮官屬壬申僧道衍爲太子少師復其姓姚賜名廣孝甲戌立子高熾爲皇太子封高煦漢王高燧趙王壬午封汪應祖爲琉球國山南王五月壬寅豐城侯李彬鎮廣東清遠伯王友充總兵官率舟師巡海六月丁亥汰冗官辛卯振松江嘉興蘇州湖州饑甲午封哈密安克帖木兒爲忠順王秋七月壬戌鄱陽民進書毀先賢杖之毀其書丙寅振江西湖廣水災八月丁酉故安南國王陳日烱弟天平

來奔九月丙午周王橚來朝獻騶虞百官請賀帝曰瑞應依德而至騶虞若果爲祥在朕更當修省丁卯徙山西民萬戶實北京命自今御史巡行察吏毋得撫拾人言賢否皆具實蹟以聞冬十月丁丑河決開封乙酉蒲城河津黃河清是月籍長興侯耿炳文家炳文自殺十一月甲辰御奉天門錄囚癸丑京師及濟南開封地震敕羣臣修省戊午蠲蘇松嘉湖杭水災田租十二月壬辰同州韓城黃河清是月下李景隆於獄是年占城別失八里琉球山北山南瓜哇真臘入貢暹羅日本琉球中山入貢者再

三年春正月庚戌大祀天地於南郊甲寅遣使責諭安南庚申復免順天永平保定田租二年二月己巳行部尚書雒僉以言事涉怨誹誅癸未趙王高燧居守北京三月甲寅免湖廣被水田租夏六月己卯中官鄭和帥舟師使西洋諸國庚辰中官山壽等帥兵出雲州覘敵甲申夏原吉等振蘇松嘉湖饑免天下農民戶口食鹽鈔庚寅胡奎謝罪請迎陳天平歸國秋九月丁酉蠲蘇松嘉湖水災田租凡三百三十八萬石丁巳徙山西民萬戶實北京冬十月盜殺駙馬都尉梅殷丁卯齊王樽有罪三賜書戒之戊子頒祖訓於諸王十二月戊辰沐

晟討八百降之庚辰都督僉事黃中呂毅以兵納陳天平於安南是年蘇門荅刺滿刺加古里淳泥來貢封其長爲王日本貢馬并俘獲倭寇爲邊患者瓜哇東西占城磔里日羅夏治合貓里火州回回入貢暹羅琉球山南山北入貢者再琉球中山入貢者三

四年春正月丁未大祀天地於南郊丙辰初御午朝令羣臣奏事得從容陳論三月辛卯朔釋奠於先師孔子甲午設遼東開原廣寧馬市乙巳賜林環等進士及第出身有差丙午胡奎襲殺陳天平於芹站前大理卿薛嵩死之黃中等引兵還夏四月己卯遣使購遺書五月

丁酉振常州廬州安慶饑庚戌齊王搏有罪削官屬護
衛留之京師六月己未朔日當食陰雲不見禮官請表
賀不許丙寅南陽獻瑞麥諭禮部曰比郡縣屢奏祥瑞
獨此爲豐年之兆命薦之宗廟秋七月辛卯朱能爲征
夷將軍沐晟張輔副之帥師分道討安南兵部尚書劉
儁叅贊軍務行部尚書黃福大理卿陳洽督餉詔曰安
南皆朕赤子惟黎季犛父子首惡必誅他脅從者釋之
罪人旣得立陳氏子孫賢者毋養亂毋玩寇毋毀廬墓
毋害禾稼毋攘財貨掠子女毋殺降有一於此雖功不
宥乙巳申誹謗之禁閏月壬戌詔以明年五月建北京

宮殿分遣大臣採木於四川湖廣江西浙江山西八月
丁酉詔通政司凡上書奏民事者雖小必以聞癸丑齊
王搏廢爲庶人九月戊辰振蘇松常杭嘉湖流民復業
者十二萬餘戶冬十月戊子成國公朱能卒於軍張輔
代領其衆乙未克隘留關庚子沐晟率師會於白鶴十
一月己巳甘露降孝陵松柏醴泉出神樂觀薦之太廟
賜百官十二月辛卯赦天下殊死以下張輔大破安南
兵於嘉林江丙申拔多邦城丁酉克其東都癸卯克西
都賊遁入海辛亥甌寧王允熙邸第火王薨是年暹羅
占城于闐淳泥日本琉球中山山南娑羅入貢瓜哇東

西真臘入貢者再別失八里入貢者三琉球進闈人還之回回結牙曲進玉椀却之

五年春正月丁卯大祀天地於南郊己巳張輔大敗安南兵於木九江二月庚寅出翰林學士解縉爲廣西叅議三月丁巳封尚師哈立麻爲大寶法王辛巳張輔大破安南兵於富良江夏四月己酉振順天河間保定饑五月甲子張輔擒黎季犛黎蒼獻京師安南平河南饑逮治匿災有司敕都察院凡災傷不以實聞者罪之六月癸未以安南平詔天下置交趾布政司己丑山陽民丁珏訐其鄉人誹謗擢爲刑科給事中甲午詔自永樂

二年六月後犯罪去官者悉宥之乙未張輔移師會韓觀討潯柳叛蠻癸卯命張輔訪交趾人才禮遣赴京師秋七月乙卯皇后崩丁卯河溢河南八月乙酉左都督何福鎮甘肅庚子錄囚雜犯死罪減等論戍流以下釋之九月壬子鄭和還乙卯御奉天門受安南俘大賚將士冬十月潯柳蠻平是年琉球中山山南娑羅日本別失八里阿魯撒馬兒罕蘇門荅刺滿刺加小葛蘭入貢六年春正月丁巳岷王梗復有罪罷其官屬辛酉大祀天地於南郊二月丁未除北京永樂五年以前逋賦免諸色課程三年三月癸丑寧陽伯陳懋鎮寧夏乙卯除

河南山東山西永樂五年以前逋賦夏四月丙申始命雲南鄉試五月壬戌夜京師地震六月庚辰詔罷北京諸司不急之務及買辦以甦民困流民來歸者復三年丁亥張輔沐晟還秋七月癸丑論平交趾功進封張輔英國公沐晟黔國公王友清遠侯封都督僉事柳升安遠伯餘爵賞有差八月乙酉交趾簡定反沐晟爲征夷將軍討之劉儁仍叅贊軍務九月己酉命刑部疏滯獄癸亥鄭和復使西洋冬十一月丁巳錄囚十二月丁酉沐晟及簡定戰於生厥江敗績劉儁及都督僉事呂毅叅政劉昱死之是月柳升陳瑄李彬等率舟師分道沿

海捕倭是年鬼力赤爲其下所弑立本雅失里爲可汗
淳泥國王來朝瓦剌占城于闐暹羅撒馬兒罕榜葛刺
馮加施蘭日本爪哇琉球中山山南入貢

七年春正月癸丑賜百官上元節假十日著爲令乙卯
大祀天地於南郊二月乙亥遣使於巡狩所經郡縣存
問高年八十以上賜酒肉九十加帛丙子徵致仕知府
劉彥才等九十二人分署府州縣辛巳以北巡告天地
宗廟社稷壬午發京師皇太子監國張輔王友率師討
簡定戊子謁鳳陽皇陵三月甲辰次東平州望祭泰山
辛亥次景州望祭恒山乙卯平安自殺壬戌至北京癸

亥大賚官吏軍民丙寅詔起兵時將士及北京効力人
民雜犯死罪咸宥之充軍者官復職軍民還籍伍壬申
柳升敗倭於青州海中敕還師夏四月癸酉朔皇太子
攝享太廟壬午海寇犯欽州副總兵李珪遣將擊敗之
閏月戊申命皇太子所決庶務六科月一類奏丙辰諭
行在法司重罪必五覆奏五月己卯營山陵於昌平封
其山曰天壽乙未封瓦剌馬哈木爲順寧王太平爲賢
義王把禿孛羅爲安樂王六月壬寅察北巡郡縣長吏
擢汶上知縣史誠祖治行第一下易州同知張騰於獄
辛亥給事中郭驥使本雅失里爲所殺丁卯斥御史洪

乘等四人詔自今御史勿用吏員秋七月癸酉淇國公
邱福爲征虜大將軍武成侯王聰同安侯火真副之靖
安侯王忠安平侯李遠爲左右叅將討本雅失里八月
甲寅邱福敗績於臚胸河福及聰真忠遠皆戰死庚申
張輔敗賊於鹹子關九月庚午朔日有食之張輔敗賊
於太平海口甲戌贈北征死事李遠莒國公王聰漳國
公遂決意親征丙子武安侯鄭亨率師巡邊壬午成安
侯郭亮備禦開平冬十月丁未削邱福封爵徙其家於
海南十一月戊寅張輔獲簡定於美良送京師誅之十
二月庚戌賜濟寧至良鄉民頻年遞運者田租一年乙

丑召張輔還是年滿刺加哈烈撒馬兒罕火州古里占城蘇門荅刺琉球中山山南入貢暹羅榜葛刺入貢者再

八年春正月辛未召寧陽侯陳懋隨征漠北己卯皇太子攝祀天地於南郊癸巳免去年揚州淮安鳳陽陳州水災田租贖軍民所鬻子女二月辛丑以北征詔天下命戶部尚書夏原吉輔皇長孫瞻基留守北京乙巳皇太子錄囚奏貫雜犯死罪以下從之丁未發北京癸亥遣祭所過名山大川乙丑大閱三月丁卯清遠侯王友督中軍安遠伯柳升副之寧遠侯何福武安侯鄭亨督

左右哨寧陽侯陳懋廣恩伯劉才督左右掖都督劉江督前哨甲戌次鳴鑾戊乙亥誓師夏四月庚申次威虜鎮以橐駝所載水給衛士視軍士皆食始進膳五月丁卯更名驢胸河曰飲馬甲戌聞本雅失里西奔遂渡飲馬河追之己卯及於幹難河大敗之本雅失里以七騎遁丙戌還次飲馬河詔移師征阿魯台丁亥回回哈刺馬牙殺都指揮劉秉謙據肅州衛以叛千戶朱廸等討平之六月甲辰阿魯台僞降命諸將嚴陣以待果悉衆來犯帝自將精騎迎擊大敗之追北百餘里丁未又敗之己酉班師秋七月丁卯次開平帝在軍念士卒艱苦

每蔬食是日宴賚始復常膳西寧侯宋琥鎮甘肅辛巳
振安慶徽州鳳陽鎮江饑壬午至北京御奉天殿受朝
賀甲午論功行賞有差八月壬寅進封柳升安遠侯乙
卯何福自殺庚申河湓開封九月己巳幸天壽山冬十
月丁酉發北京是月倭寇福州十一月甲戌至京師十
二月癸巳阿魯台遣使貢馬戊午陳季擴乞降以爲交
趾右布政使季擴不受命是年失捏干寇黃河東岸寧
夏都指揮王俶敗沒淳泥呂宋馮嘉施蘭蘇門荅刺榜
葛刺入貢占城貢象琉球山南爪哇暹羅貢馬琉球中
山入貢者三

九年春正月甲戌大祀天地於南郊丙子柳升鎮寧夏
己卯張輔爲征虜副將軍會沐晟討交趾丙戌豐城侯
李彬平江伯陳瑄率浙江福建兵捕海寇二月辛亥陳
瑛有罪下獄死丙辰詔赦交趾丁巳倭陷昌化千戶所
己未工部尚書宋禮開會通河三月甲子賜蕭時中等
進士及第出身有差壬午浚祥符縣黃河故道戊子劉
江鎮遼東夏六月乙巳鄭和還自西洋是月下交趾右
叅議解縉於獄秋七月丙子張輔敗賊於月常江九月
戊寅諭法司凡死罪必五覆奏壬午命屯田軍以公事
妨農務者免徵子粒著爲令冬十月乙未寬北京謫徙

軍民賦役癸卯封哈密兔力帖木兒爲忠義王乙巳復修太祖實錄十一月戊午蠲陝西逋賦癸亥張輔敗賊於生厥江丁卯立皇長孫瞻基爲皇太孫壬申韓觀爲征夷副將軍改鎮交趾都指揮葛森鎮廣西丙子敕法司決遣罪囚毋淹滯是月遣使督瘞戰場暴骨十二月壬辰敕宥福餘朶顏泰寧三衛罪令入貢閏月丁巳命府部諸臣陳軍民利弊是年浙江湖廣河南順天揚州水河南陝西疫遣使振之滿刺加王來朝瓜哇榜葛刺古里柯枝蘇門荅刺阿魯彭亨急蘭丹南巫里暹羅入貢阿魯台來貢馬別失八里獻文豹琉球中山入貢者

三

十年春正月己丑命入覲官千五百餘人各陳民瘼不言者罪之言有不當勿問丁酉大祀天地於南郊癸丑振平陽饑逮治布政使及郡縣官不奏聞者二月辛酉蠲山西河南逋賦庚辰遼王植有罪削其護衛三月丁亥豐城侯李彬討甘肅叛寇八耳思朶羅歹戊子賜馬鐸等進士及第出身有差甲辰免北京水災租稅夏六月甲戌諭戶部凡郡縣有司及朝使目擊民艱不言者悉逮治秋七月癸卯禁中官干預有司政事八月癸丑張輔大破交趾賊於神投海己未敕邊將自長安嶺迤

西迄洗馬林築石垣深濠塹冬十月戊辰獵城南武岡
十一月壬午侍講楊榮經略甘肅丙辰鄭和復使西洋
是年淳泥占城暹羅滿刺加榜葛刺蘇門荅刺南淳利
琉球山南入貢

十一年春正月辛巳朔日有食之詔罷朝賀宴會壬午
諭通政使禮科給事中凡朝覲官境內災傷不以聞爲
他人所奏者罪之辛卯大祀天地於南郊辛丑豐城侯
李彬鎮甘肅召宋琥還二月辛亥始設貴州布政司癸
亥令北京民戶分養孳生馬著爲令甲子幸北京皇太
孫從尚書蹇義學士黃淮諭德楊士奇洗馬楊溥輔皇

太子監國乙丑發京師命給事中御史所過存問高年
賜酒肉及帛丙寅葬仁孝皇后於長陵辛未次鳳陽謁
皇陵夏四月己酉至北京五月丁未曹縣獻騶虞禮官
請賀不許秋七月戊寅封阿魯台爲和寧王八月甲子
北京地震乙丑鎮遠侯顧成討思州靖州叛苗九月壬
午詔自今郡縣官每歲春行視境內蝗蝻害稼卽捕絕
之不如詔者二司并罪冬十月丙寅以璽書命皇太子
錄囚十一月戊寅以野蠶繭爲衾命皇太子薦太廟壬
午瓦剌馬哈木兵渡飲馬河阿魯台告警命邊將嚴守
備甲申寧陽侯陳懋都督譚青馬聚朱崇巡寧夏大同

山西邊簡練士馬尋命陝西山西及潼關等五衛兵駐宣府中都遼東河南三都指揮使司及武平等四衛兵會北京乙巳應城伯孫巖備開平十二月壬子張輔沐晟大敗交趾賊於愛子江是年馬哈木弑其主本雅失里立答里巴爲可汗別失八里滿刺加占城爪哇西王入貢琉球中山入貢者四琉球山南入貢者再

明史卷六終

明史卷七

本紀第七

總裁官總理事務經筵講官保泰太子太保保和殿大學士兼管吏部戶部尚書加級張廷玉等奉

敕修

成祖三

書二年春正月庚寅思州苗平辛丑發山東山西河南

鳳陽淮安徐邳民十五萬運糧赴宣府二月己酉大

閱庚戌親征瓦剌安遠侯柳升領大營武安侯鄭亨領

中軍寧陽侯陳懋豐城侯李彬領左右哨成山侯王通

都督譚青領左右掖都督劉江朱榮爲前鋒庚申振鳳

翔隴州饑按長吏不言者罪三月癸未張輔俘陳季擴

于老撾以獻交趾平庚寅發北京皇太孫從夏四月甲辰朔次興和大閱己酉頒軍中賞罰號令庚戌設傳令紀功官丁卯次屯雲谷孛羅不花等來降五月丁丑命尚書光祿卿給事中爲督陣官察將士用命不用命者六月甲辰劉江遇瓦剌兵戰於康哈里孩敗之戊申次忽蘭忽失溫馬哈木帥衆來犯大敗之追至土刺河馬哈木宵遁庚戌班師宣捷於阿魯台戊午次三峯山阿魯台遣使來朝己巳以敗瓦剌詔天下秋七月戊子次紅橋詔六師入關有踐田禾取民畜產者以軍法論己亥次沙河皇太子遣使來迎八月辛丑朔至北京御奉

天殿受朝賀丙午蠲北京州縣租二年戊午賞從征將士九月癸未郭亮徐亨備開平丙戌靖州苗平甲午費璫鎮甘肅劉江鎮遼東閏月甲辰以太子遣使迎駕緩徵侍讀黃淮侍講楊士奇正字金問及洗馬楊溥芮善下獄未幾釋士奇復職甲子召吳高還丁卯都督朱榮鎮大同冬十一月甲辰錄囚庚戌廢晉王濟熈爲庶人庚申蠲蘇松杭嘉湖水災田租四十七萬九千餘石是年泥八刺國沙的新葛來朝封爲王彭亨烏斯藏入貢眞臘進金縷衣琉球中山王貢馬榜葛刺貢麒麟

十三年春正月丙午塞居庸以北隘口丁未馬哈木謝

罪請朝貢許之壬子北京午門災戊午敕內外諸司蠲
諸宿逋將士軍官犯罪者悉宥之二月癸酉遣指揮劉
斌給事中張磐等十二人巡視山西山東大同陝西甘
肅遼東軍操練屯政覈實以聞甲戌命行在禮部會試
天下貢士癸未張輔等師還戊子論平交趾功賞賚有
差三月己亥策士於北京賜陳循等進士及第出身有
差丙午廣西蠻叛指揮同知葛森討平之夏四月戊辰
張輔鎮交趾五月丁酉朔日有食之乙丑鑿清江浦通
北京漕運六月振北京河南山東水災秋七月癸卯鄭
和還乙巳四川戎縣山都掌蠻平八月庚辰振山東河

南北京順天州縣饑九月壬戌北京地震冬十月甲申
獵於近郊壬辰法司奏侵冒官糧者帝怒命戮之及覆
奏帝曰朕過矣仍論如律自今死罪者皆五覆奏著爲
令十二月蠲順天蘇州鳳陽浙江湖廣河南山東州縣
水旱田租是年琉球山南山北瓜哇西王占城古里柯
枝南渤利甘巴里滿刺加忽魯謨斯哈密哈烈撒馬兒
罕火州土魯番蘇門答刺俺都淮失刺思入貢麻林及
諸番進麒麟天馬神鹿琉球中山入貢者再

十四年春正月己酉北京河南山東饑免永樂十二年
逋租發粟一百三十七萬石有奇振之辛酉都督金玉

討山西廣靈山寇平之三月癸巳都督梁福鎮湖廣貴州壬寅阿魯台敗瓦剌來獻捷壬申禮部尚書呂震請封禪帝曰今天下雖無事四方多水旱疾疫安敢自謂太平且六經無封禪之文事不師古甚無謂也不聽夏四月乙亥胡廣爲文淵閣大學士六月丁卯都督同知蔡福等備倭山東秋七月丁酉遣使捕北京河南山東州縣蝗壬寅河決開封乙巳錦衣衛指揮使紀綱有罪伏誅八月癸酉旦壽星見禮臣請上表賀不許丁亥作北京西宮九月癸卯京師地震戊申發北京冬十月丁丑次鳳陽祀皇陵癸未至自北京謁孝陵十一月壬寅

詔文武羣臣集議營建北京丙午召張輔還戊申漢王
高煦有罪削二護衛徙山東山西湖廣流民於保安州
賜復三年十二月丁卯鄭和復使西洋是年占城古里
瓜哇滿刺加蘇門答刺南巫里淳泥彭亨錫蘭山溜山
南渤利阿丹麻林忽魯謨斯柯枝入貢琉球中山入貢
者再

十五年春正月丁酉大祀天地於南郊壬子平江伯陳
瑄督漕運木赴北京二月癸亥谷王橐有罪廢爲庶人
丁卯豐城侯李彬鎮交趾壬申泰寧侯陳珪董建北京
柳升王通副之三月丁亥交趾始貢士至京師丙申雜

犯死罪以下囚輸作北京贖罪丙午漢王高煦有罪徙封樂安州壬子北巡發京師皇太子監國夏四月己巳次邾城申禁軍士毋踐民田稼有傷者除今年租或先被水旱逋租亦除之癸未西宮成五月丙戌至北京六月丁酉李彬討交趾賊黎核斬之己亥中官張謙使西洋還敗倭寇於金鄉衛秋八月甲午甌寧人進金丹帝曰此妖人也令自餌之毀其方書九月丁卯曲阜孔子廟成帝親製文勒石冬十月李彬敗交趾賊楊進江斬之十一月癸酉禮部尚書趙玗爲兵部尚書巡視塞北屯戍軍民利弊是年西洋蘇祿東西峒王來朝琉球中

山別失八里琉球山南真臘淳泥占城暹羅哈烈撒馬
兒罕入貢

十六年春正月甲寅交趾黎利反都督朱廣擊敗之甲
戌倭陷松門衛按察司僉事石魯坐誅興安伯徐亨都
督夏貴備開平二月辛丑交趾四忙縣賊殺知縣歐陽
智以叛李彬遣將擊走之三月甲寅賜李騏等進士及
第出身有差都督僉事劉鑑備邊大同夏五月庚戌重
修太祖實錄成丁巳胡廣卒秋七月己巳敕責陝西諸
司比聞所屬歲屢不登致民流莩有司坐視不恤又不
以聞其咎安在其速發倉儲振之贊善梁潛司諫周冕

以輔導皇太子有闕皆下獄死冬十二月戊子諭法司
朕屢敕中外官潔己愛民而不肖官吏恣肆自若百姓
苦之夫良農必去稂莠者爲害苗也繼今犯賊必論如
法辛丑成山侯王通馳傳振陝西饑是年暹羅占城瓜
哇蘇門答刺泥八刺滿刺加南渤利哈烈沙哈魯千里
達撒馬兒罕入貢琉球中山入貢者再

十七年春二月乙酉興安伯徐亨備興和開平大同夏
五月丙午都督方政敗黎利於可藍柵六月壬午免順
天府去年水災田租戊子劉江殲倭寇於望海埭封江
廣寧伯秋七月庚申鄭和還八月中官馬騏激交趾乂

安土知府潘僚反九月丙辰慶雲見禮臣請表賀不許
冬十二月庚辰諭法司曰刑者聖人所慎匹夫匹婦不
得其死足傷天地之和召水旱之災甚非朕寬恤之意
自今在外諸司死罪咸送京師審錄三覆奏然後行刑
乙未工部侍郎劉仲廉覈實交陞戶口田賦察軍民利
病是年哈密土魯番失刺思亦思弗罕真臘占城哈烈
阿魯南渤利蘇門答刺八答黑商滿刺加入貢琉球中
山入貢者四

十八年春正月癸卯李彬及都指揮孫霖徐諤敗黎利
於磊江閏月丙子翰林院學士楊榮金幼孜爲文淵閣

大學士庚辰擢人材布衣馬麟等十三人爲布政使叅政叅議二月己酉蒲臺妖婦唐賽兒作亂安遠侯柳升帥師討之三月辛巳敗賊於卸石柵寨都指揮劉忠戰沒賽兒逸去甲申山東都指揮僉事衛青敗賊於安邱指揮王眞敗賊於諸城獻俘京師戊子山東布政使儲挺張海按察使劉本等坐縱盜誅戊戌以逗留徵柳升下吏尋釋之夏五月壬午左都督朱榮鎮遼東庚寅交趾叅政侯保馮貴禦賊戰死六月丙午北京地震秋七月丁亥徐亨備開平八月丁酉朔日有食之九月己巳召皇太子丁亥詔自明年改京師爲南京北京爲京師

冬十月庚申李彬遣指揮使方政敗黎利於老撾十一月戊辰以遷都北京詔天下是月振青萊饑十二月己未皇太子及皇太孫至北京癸亥北京郊廟宮殿成是年始設東廠命中官刺事古麻刺朗王來朝暹羅占城瓜哇滿刺加蘇門答刺蘇祿西王入貢

十九年春正月甲子朔奉安五廟神主於太廟御奉天殿受朝賀大宴甲戌大祀天地於南郊戊寅大赦天下癸巳鄭和復使西洋二月辛丑都督僉事胡原帥師巡海捕倭三月辛巳賜曾鶴齡等進士及第出身有差夏四月庚子奉天華蓋謹身三殿災詔羣臣直陳闕失乙

已詔罷不便於民及不急諸務蠲十七年以前逋賦免
去年被災田糧已酉萬壽節以三殿災止賀癸丑蹇義
等二十六人巡行天下安撫軍民五月乙丑出建言給
事中柯暹御史何忠鄭維桓羅通等爲知州庚寅令交
趾屯田秋七月己巳帝將北征敕都督朱榮領前鋒安
遠侯柳升領中軍寧陽侯陳懋領御前精騎永順伯薛
斌恭順伯吳克忠領馬隊武安侯鄭亨陽武侯薛祿領
左右哨英國公張輔成山侯王通領左右掖八月辛卯
朔日有食之冬十一月辛酉分遣中官楊實御史戴誠
等覈天下庫藏出納之數丙子議北征軍餉下戶部尚

書夏原吉刑部尚書吳中於獄兵部尚書方賓自殺辛巳下侍讀李時勉於獄甲申發直隸山西河南山東及南畿應天等五府滁和徐三州丁壯運糧期明年二月至宣府是年瓦剌賢義王太平安樂王把禿孛羅來朝忽魯謨斯阿丹祖法兒刺撒不刺哇木骨都束古里柯枝加異勒錫蘭山溜山南渤利蘇門答刺阿魯滿刺加甘巴里蘇祿榜葛刺淳泥古麻刺朗王入貢暹羅入貢者再

二十年春正月己未朔日有食之免朝賀詔羣臣修省辛未大祀天地於南郊壬申豐城侯李彬卒於交趾二

月乙巳隆平侯張信兵部尚書李慶分督北征軍餉役民夫二十三萬五千有奇運糧三十七萬石三月丙寅詔有司遇災先振後聞乙亥阿魯台犯興和都指揮王喚戰死丁丑親征阿魯台皇太子監國戊寅發京師辛巳次雞鳴山阿魯台遁夏四月乙卯次雲州大閱五月乙丑獵於偏嶺丁卯大閱辛未次西涼亭壬申大閱乙酉次開平六月壬辰令軍行出應昌結方陣以進癸巳諜報阿魯台兵攻萬全諸將請分兵還擊帝曰詐也彼慮大軍搗其巢穴欲以牽制我師敢攻城哉甲午次陽和谷寇攻萬全者果遁去秋七月己未阿魯台棄輜重

於濶樂海側北遁發兵焚之收其牲畜遂旋師謂諸將
曰阿魯台敢悖逆恃兀良哈爲羽翼也當還師翦之簡
步騎二萬分五道並進庚午遇於屈裂兒河帝親擊敗
之追奔三十里斬部長數十人辛未徇河西捕斬甚衆
甲戌兀良哈餘黨詣軍門降是月皇太子免南北直隸
山東河南郡縣水災糧芻共六十一萬有奇八月戊戌
諸將分道者俱獻捷辛丑以班師詔天下壬寅鄭亨薛
祿守開平鄭和還九月壬戌至京師癸亥下左春坊大
學士楊士奇於獄丙寅下吏部尚書蹇義禮部尚書呂
震於獄尋俱釋之辛未錄從征功封左都督朱榮武進

明史卷一百一十五
本紀九
伯都督僉事薛貴安順伯冬十月癸巳分遣中官及朝臣八十人覈天下倉糧出納之數十二月辛卯朱榮鎮遼東閏月戊寅乾清宮災是年暹羅蘇門答刺阿丹等國遣使隨貢方物占城琉球中山卜花兒哈密瓦剌土魯番瓜哇入貢

二十一年春正月乙未大祀天地於南郊癸卯交趾叅將榮昌伯陳智追敗黎利於車來二月己巳都指揮使鹿榮討柳州叛蠻平之三月庚子御史王愈等會決重囚誤殺無罪四人坐棄市夏五月癸未免開封南陽衛輝鳳陽等府去年水災田租己丑常山護衛指揮孟賢

等謀逆伏誅六月庚戌朔日有食之秋七月戊戌復親
征阿魯台安遠侯柳升遂安伯陳英領中軍武安侯鄭
亨保定侯孟瑛領左哨陽武侯薛祿新寧伯譚忠領右
哨英國公張輔安平侯李安領左掖成山侯王通興安
伯徐亨領右掖寧陽侯陳懋領前鋒庚子釋李時勉復
其官辛丑皇太子監國壬寅發京師戊申次宣府敕居
庸關守將止諸司進奉八月己酉大閱庚申塞黑峪長
安嶺諸邊險要丁丑皇太子免兩京山東郡縣水災田
租九月戊子次西陽河癸巳聞阿魯台爲瓦剌所敗部
落潰散遂駐師不進冬十月甲寅次上莊堡迤北王子

也先土干帥所部來降封忠勇王賜姓名金忠庚午班師十一月甲申至京師是年錫蘭山王來朝又遣使入貢占城古里忽魯謨斯阿丹祖法兒刺撒不刺哇木骨都束柯枝加異勒溜山南渤利蘇門答刺阿魯滿刺加失刺思榜葛刺琉球中山入貢

二十二年春正月甲申阿魯台犯大同開平詔羣臣議北征敕邊將整兵俟命丙戌徵山西山東河南陝西遼東五都司及西寧鞏昌洮岷各衛兵期三月會北京及宣府戊子大祀天地於南郊癸巳鄭和復使西洋三月戊寅大閱諭諸將親征命柳升陳英領中軍張輔朱勇

領左掖王通徐亨領右掖鄭亨孟瑛領左哨薛祿譚忠
領右哨陳懋金忠領前鋒己卯賜邢寬等進士及第出
身有差夏四月戊申皇太子監國己酉發京師庚午次
隰寧謀報阿魯台走答蘭納木兒河遂趨進師五月己
卯次開平使使招諭阿魯台諸部乙酉瘞道中遺骸丁
酉宴羣臣於應昌命中官歌太祖御製詞五章曰此先
帝所以戒後嗣也雖在軍旅何敢忘己亥次威遠州復
宴羣臣自製詞五章命中官歌之皇太子令免廣平順
德揚州及湖廣河南郡縣水災田租六月庚申前鋒至
答蘭納木兒河不見敵命張輔等窮搜山谷三百里無

所得進駐河上癸亥陳懋等引兵抵白邨山以糧盡還甲子班師命鄭亨等以步卒西會於開平壬申夜南京地震秋七月庚辰勒石於清水源之崖戊子遣呂震以旋師諭太子詔告天下己丑次蒼崖戌不豫庚寅至榆木川大漸遺詔傳位皇太子喪禮一如高皇帝遺制辛卯崩年六十有五大監馬雲密與大學士楊榮金幼孜謀以六軍在外祕不發喪鎔錫爲梲以斂載以龍輦所至朝夕上饔如常儀壬辰楊榮偕御馬監少監海壽馳訃皇太子壬寅次武平鎮鄭亨步軍來會八月甲辰楊榮等至京師皇太子卽日遣太孫奉迎於開平己酉次

鵬鶚谷皇太孫至軍中發喪壬子及郊皇太子迎入仁智殿加殮納梓宮九月壬午上尊諡曰體天弘道高明廣運聖武神功純仁至孝文皇帝廟號太宗葬長陵嘉靖十七年九月改上尊諡曰啟天弘道高明肇運聖武神功純仁至孝文皇帝廟號成祖

贊曰文皇少長習兵據幽燕形勝之地乘建文孱弱長驅內向奄有四海卽位以後躬行節儉水旱朝告夕振無有壅蔽知人善任表裏洞達雄武之畧同符高祖六師屢出漠北塵清至其季年威德遐被四方賓服受朝命而入貢者殆三十國幅隕之廣遠邁漢唐成功駿烈

明史卷七
本紀三
卓乎盛矣然而革除之際倒行逆施慙德亦曷可掩哉

明史卷七終

[G e n e r a l I n f o r m a t i o n]

书名=百衲本二十四史 明史 2

作者= (清) 张廷玉等奉敕纂修

页数=182

SS号=12460601

出版日期=1936

出版社=商务印书馆